

Xtiidxza'c Jesucrist ni bacaa San Juan

Bi't Xi'n Dios loj guidxliuj

¹ Diisd guia'xchej chi gad guidxliuj gacchaaw, mal yu' b́en naj xtiidx Dios. Laaman za'ně Dios abi' laagajcaman naj Dios. ² Laaman mal za'ně Dios diisd guia'xchej. ³ Laaman been graczi ni yu'. Achetczi ni yu' niajc bal id laaman. ⁴ Laaman rajp guialnaban, guiáad guialnaban guin naj bajl par gra bénguidxliuj. ⁵ Bajl guin rusni b́en nacay xquiarguejn, abi' ad rajct rutěě guialnacay guin loj bajl guin.

⁶ Guyu tijb b́en brii laj Waj, Dios guxhaal laaman, ⁷ bidgaguieman diidx xcwent b́en naj xbajl Dios, din gac chililadx gra ree bejn laaman. ⁸ Per ad Wajt goc bajl guin, bi'tzaman bidgaguieman diidx xcwent bajl guin. ⁹ Din b́en naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

¹⁰ Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman. ¹¹ Bi'taman loj ree b́en Israel, abi' majsi gojcaman b́en Israel, per ad bidxga't reeman laaman. ¹² Per, gra ree b́en bidxga' laaman bililadx těě reeman laaman, beenman laa reeman xi'n Dios. ¹³ Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rěn bejn chu' xi'nman, por guial rliladx reeman ma naj reeman xi'n Dios.

¹⁴ Jesús, b́en naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyēnman bejn ree gunee tēēman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. ¹⁵ Chi be Waj xtiidxaman loj ree bejn, gunee man rejs, rēbaman:

—Jesús guie naj b́en ruzatan, chi rnin guial b́en zēēd xichan mazri lasajcaman guial lon, din diizd gocli mal yu'man guial lon.

¹⁶ Dád rēnman dunuj ree, gra dxejczy raca' dugra ree xguialnaza'caman. ¹⁷ Por Moisejs banee Dios xleyaman duloj ree, per por Jesucrist bayagbee ree xhienaag rēn Dios dunuj ree xhie tēē naag naj xtiidxliman. ¹⁸ Ad yu't dxej waguiaa bejn Dios. B́en naj tijbzi xi'nman. B́en nabannē laaman balūū duloj ree xhienaag naj Dios.

*Waj b́en baroobnijs rēbaman chu naj Jesús
(Mt. 3:11-12; Mr. 1:7-8; Lc. 3:15-17)*

¹⁹ Diizd Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

²⁰ Dxel be Waj diidxli loj reeman, rēbaman:

—Ad najtan naj Cristo.

²¹ Abi' gunabdiidx reeman lojman stijb rēb reeman:

—¿Chuza najl? ¿Lūjn naj Elías ya, b́en badēē xtiidx Dios loj ree bejn?

Badxi' Wajn rēbaman:

—Ad najtan.

Dxel gunabdiidx reeman stijb rēb reeman:

—O, ¿lūjn naj b́en naj diidx gui't ya, b́en gudēē xtiidx Dios loj ree bejn?

Badxi'man laan rëbaman:

—Ad najtan.

²² Abi' rëb reeman:

—¿Chuza najl? Din rayal yugnë'n ruson loj ree bën guxhaal dunujn. Guna chu najl.

²³ Dxel rëb Waj loj reeman:

—Naj naj tijb bën rbidxa' loj yujbidx: “Gol guxhal tijb nejz nali par bën ca' guialrniabee” —zi'c rëb Isaías bën badëë xtiidx Dios loj ree bejn.

²⁴ Abi' ree bën guxhaal ree bënfarisew din guinieenë reeman Waj, ²⁵ gunabdiidx reeman lojman, rëb reeman:

—Bal id lüjn naj Cristo, ni'qui Elías, ni'qui bën naj diidx gui't, bën gudëë xtiidx Dios loj ree bejn, ¿chexquiza zeel ruroobnijsil bejn?

²⁶ Badxi' Waj laan rëbaman:

—Naj ruroobnijs con nijs, per lojdi no'ch tijb bën ad wayünbeetidi. ²⁷ Laaman naj bën zëed xichan, ni'qui xgurëchaman ad rayalt gaxhiecan guial najman bën mazri lasajc guial lon.

²⁸ Gra niguie gojc lod la Betábara, ni naj stiblad ro' guiiw Jordán, lod baroobnijs Waj bejn ree.

Jesús naj Xi'n Dios

²⁹ Chi bareguiaal, baguiaa Waj zibig Jesús lod za'man, dxel rëbaman:

—Gol baguiaa, bën guin naj bën bacaabee Dios din guiëtaman zi'c xiildoo por xtol ree bénguidxliuj.

³⁰ Laaman bazatan lojdi chi rnin: “Xichan zidnal bën mazri lasajc guial lon, din laaman mal yu' diizd gocli guial lon.” ³¹ Ni'qui naj ad gogbeetan guial laaman naj bën gui't, per naj zialan din

gurobnijsan bejn ree con nijs din chile' güünbee ree bën Israel laaman.

³² Rëb tëë Waj loj reeman:

—Naj baguia biguiajt xSprijt Dios diizd xanyabaa zi'c tijb palom xt guiycaman. ³³ Majsi ad nünbeetan laaman, per bën guxhaal naj barobnijsan con nijs, laaman na lon: “Chi guguaal guiat xSprijt Dios xt guiyc tijb bejn, laaman naj bën runee xSprijt Dios.” ³⁴ Naj ma baguia laaman, abi' ragbeechaawan guial laaman naj Xi'n Dios.

Bën binal ree Jesús yaloj

³⁵ Chi bareguiaal, za' Waj yagaj stijb, za'në tio'p ree xbejnman. ³⁶ Abi' chi baguiaaman cadëd Jesús, dxel rëbaman loj reeman:

—Gol baguiaa, bën guinan naj zi'c xi xiildoo Dios din guiëtaman por xtol bénguidxliuj.

³⁷ Chi biguiejn reeman rëb Waj zian, dxel binal reeman Jesús. ³⁸ Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguilidi?

Badxi' reeman laan rëb reeman:

—Mextr, ¿ban zojbil?

³⁹ Dxel rëb Jesús loj reeman:

—Gol guda din guguaadi.

Dxel wej reeman biquiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxë.

⁴⁰ Tijb ree xbejn Waj bën binal Jesús, bën ba-caagdiajg ni rëb Waj, laaman brii laj Andrejs, bijch Simón Bëd. ⁴¹ Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bén naj Mesías —rèn guiëban Cristo.

⁴² Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rèn guiëban Bëd.

Gurejdx Jesús Felip në Natanael

⁴³ Chi bareguiaal been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

⁴⁴ Ladx Felip guin naj guiedx Betsaida, ni gajc naj ladx Andrejs con Bëd. ⁴⁵ Dxel bigdiil Felip Natanael, abi' rëbaman lojman:

—Ma badxaaglojn bén ruza't Moisejs loj xlibr xleyaman, bén ruza't ree bén badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bén Nazaret.

⁴⁶ Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguiaal.

⁴⁷ Chi baguiaa Jesús zëed Natanael, rëbaman:

—Guie zëed tijb bén naj quijb bén Israel, abi' ad rusquieetaman.

⁴⁸ Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

⁴⁹ Zianz rëb Natanael lojman:

—Mextr, lüj naj Xi'n Dios, lüj naj rey Israel.

⁵⁰ Badxi' Jesús laan rëbaman:

—¿Rliladxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguiaal.

⁵¹ Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguaajt tëë reeman xt guiic Bén guxhaal Dios loj guidxliuj.

2

Wej Jesús loj tijb guialruxhliaa

¹ Ni goc choon dxej guyu tijb guialruxhliaa luguedx Caná, ni riga' niz Galilea. Dxel në xniaa Jesús za' yagaj, ² abi' në Jesús con ree xbejnman gunee reeman persi wej reeman loj lanij guin.

³ Chi babidx vin, dxel rëb xniaa Jesús lojman:

—Achetri vin rajp reeman.

⁴ Badxi' Jesús san rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

⁵ Per xniaaman rëb gajcaman loj ree bén cayüjn mandad yagaj:

—Gol been gra ni naman.

⁶ Yagaj za' xho'p ree guiajs guiaj, ni ru nijs ni rüjnnë ree bén Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. ⁷ Abi' rëb Jesús loj ree bén rüjn mandad guin:

—Gol bacha ree guiajs guie nijs.

Dxel bachadi reeman laa reen, ⁸ abi' rëbaman loj reeman:

—Yan gol gulëë ta'nan, gol bigdëen loj bén canabee loj lanij guie.

Dxel bigdëe reeman laan lojman, ⁹ abi' Bén canabee loj lanij guin beenman prueb nijs bayajc vin guin, sin guial niagbeeman ban guzan, Bén cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin, ¹⁰ rëbaman lojx:

—Graczi bejn rgui's yaloj vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

¹¹ Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

¹² Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

Babëe Jesús Bén ruto' ree ro' yadooro'

(Mt. 21:12-13; Mr. 11:15-18; Lc. 19:45-46)

¹³ Chi ma zidyob pascw xlanij ree Bén Israel, wej Jesús Jerusalén. ¹⁴ Abi' ro' yadooro' bidxaaglojman Bén cuto' ree go'n, con ree xiil con ree palom, në ree Bén zojb xan mex ruchaa reeman xmilia ree Bén ziaad lood ren. ¹⁵ Chi baguiaa Jesús zian, dxel beenchaawaman tijb duu persi babëeman gra reeman, con gra ree xgo'n reeman në ree xiil. Gutie'chaman xmilia ree Bén ruchaa milia guin barexguiat tëeman xmex reeman. ¹⁶ Dxel rëbaman loj ree Bén cuto' palom:

—¡Gol babëe reeb guie! ¡Ad rüjnnëdi lidx da Dadan zi'c luguia'!

¹⁷ Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸ Zianz rëb ree bén Israel lojman:

—¿Xhie milagr gulüül du lojn din yayagbeen guial rajpil guialrniabee güünl zian?

¹⁹ Badxi' Jesús laan rëbaman:

—Gol base'n yadoo guie, naj yayün laan loj choon dxejzi.

²⁰ Dxel rëb ree bén Israel guin lojman:

—Tiuubixho'p ijz goglaa reeman been reeman yadoo guie, ¿guiáad lüj ya yayüjnlan choon dxejzi?

²¹ Per Jesús xcuerp gajcaman ruza'taman chi ruza'taman yadoo guin. ²² Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëe reeman ni ca loj xtiidx Dios.

Jesús nünbee xixgab gra bejn

²³ Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. ²⁴ Per laaman ad rëbtaman loj reeman chu najman, din laaman nünbee chaaw xhien-aag naj xixgab reeman. ²⁵ Ad biaadxtaman chu niëjb lojman xhien-aag naj bejn, din laaman rag-bee chaaw xhien-aag naj xixgab tijbgaj bejn.

3

Bigneenë Nicodemo Jesús

¹ Guyu tijb bénfarisew brii lajman Nicodemo, gojcaman tijb guxtis loj ree bén Israel. ² Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutczi zajc güün lasa' ree milagr ni rüjnl bal id za'në Dios laaman.

³ Dxel rëb Jesús:

—Diidxiczi rnin lüj, bën ad zajlt stijb, ad zajct guguaaman xguialrniabee Dios.

⁴ Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xniaaman ya abi' galaman stijb?

⁵ Badxi' Jesús laan rëbaman:

—Diidxiczi rnin, bën ad riobnijst ad nabannë tëetaman xSprijt Dios ad zile't yayuman loj xguialrniabee Dios. ⁶ Bën naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban. ⁷ Ad bal radxa lojl guial rnin: “Rüjn naguiejn gal bejn stijb.” ⁸ Din zi'c rbi' bi gralad abi' majsi riguejnl chi rbi'n, per ni'quid ragbeetil ban zëedan o ban zën. Ziangajc naj xSprijt Dios con gra ree bën nabannë laaman.

⁹ Dxel rëb Nicodemo lojman:

—¿Xhienaag rajc zian?

¹⁰ Badxi' Jesús rëbaman:

—¿Lüj, naj mextr loj ree bën Israel, ad rignia'til gra ree ni guin ya? ¹¹ Diidxiczi rnin lojl, raneen ni rayagbeen ni baguiaa tëen, per lëjt ad rliladxtidi ni ranan. ¹² Bal id rliladxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

¹³ 'Achut wayej xanyabaa, tijbzi bën biguiat diizd xanyabaa, Bën guxhaal Dios loj guidxliuj.

¹⁴ Abi' zi'c bacaa Moisejs bëel guiib loj yag niz loj

yujbidx, ziangajc Bén guxhaal Dios loj guidxliuj, gucaa reeman laaman loj crüjz, ¹⁵ din gra bén chililadx laaman ad zanijt reeman loj Dios, gap reeman guialnaban tiblayaa con laaman.

Rën Dios bejn

¹⁶ 'Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bén chililadx laaman ad zanijt reeman loj Dios, gap reeman guialnaban tiblayaa con laaman. ¹⁷ Din Dios ad guxhaalt xi'nman loj guidxliuj din gudëedaman bejn casti, guxhaalaman laaman din gap ree bejn perdon loj Dios.

¹⁸ 'Bén rliladx Xi'n Dios ad rayaltaman xcasti Dios. Per bén ad rliladxt, laaman ma rayal casti guial ad rliladxtaman Xi'n Dios, bén naj tijbzi xi'nman. ¹⁹ Bén ad rliladxt ree rayal reeman casti, din yan ni bi't bén naj xbajl Dios, mazri bayuladx reeman nejz mal, guial rüjn reeman ganax ni mal. ²⁰ Graczi ree bén rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman. ²¹ Per ree bén naban zi'c rayal loj Dios, laa reeman rbig loj xbajlaman din guiguien guial graczi ni cayüjn reeman naj ni rën Dios.

Waj bén baroobnijs ruza'taman Jesús stijb

²² Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. ²³ Nëgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman. ²⁴ Laan goc chi gad Waj chu' ladxguiib.

²⁵ Per bëlzi ree xbejn Waj, con za tio'p choon gajc ree bën Israel guzuloj cadildiidx reeman por xcostumbr reeman guial xhienaag gac reeman naya. ²⁶ Dxel biguiedx reeman loj Waj:

—Mextr, bën guzunël stiblad ro' guiiw Jordán, bën bel xtiidx du lojn, nē laaman curoobnijs bejn ree abi' gra reeman zinal laaman.

²⁷ Badxi' Waj laan rëbaman:

—Achut zajc gap guialrniabee bal id Dios gudëe laan. ²⁸ Lëjt ragbee guial biguiejndi rën guial ad najtan naj Cristo, naj guneed lojman zidgagojnan por laaman. ²⁹ Dunuj ree rayagbee guial loj guialruxhliaa, xin za'nē biingunaa guin, laaxan cuxhliaa, guiáad xmiwix xin za' con laax rabaanë da'tix laax chi riguejnx rnieex. Ziangajc naj dád rabaanë'n laaman. ³⁰ Abi' laaman gusnuu gacaman mazri bën zojbloj, guiáad naj gusnuu gacan bën ad lasajc guial lojman.

Bën zëed xanyabaa

³¹ 'Din bën zëed diizd xanyabaa, laaman naj bën rniabee loj gra. Per bënguidxliuj, bënguidxliujzi najman abi' ganax ni yu' loj guidxliuj ruza'taman. Per Bën zëed diizd xanyabaa laaman rniabee gra, ³² abi' rüman ni ma baguiaaman ni ma bigueijn tëëman, per achut rliladx ni rnieeman. ³³ Bal yu' bën rliladx xtiidxaman, zian rguien guial ni diidxli naj xtiidx Dios. ³⁴ Abi' bën zëed por Dios, laaman rü xtiidx Dios guial guidiblagaa badëed Dios xSprijtaman lojman. ³⁵ Dios rën Xi'nman abi' basa'nman gra lojman. ³⁶ Abi' chutëez bën rliladx Xi'nman, laaman rajp guialnaban tiblayaa

loj Dios. Per bén ad rtiëjbt chililadx, ad rajptaman guialnaban guin, laaman rayal xcasti Dios.

4

Jesús con béngunaa Samaria

¹ Gogbee ree bénfarisew guial mazri zien bejn ma zinal Dad Jesús mazri zien tée bejn ruuroobnijsaman guial loj Waj, ² majsi diidxliczi ad Jesústan ruuroobnijs bejn ree, bén naj ree xbejnman ruuroobnijs. ³ Chi gogbeeman zian dxel briiman niz Judea zëman niz Galilea stijb.

⁴ Per chi zëman niz Galilea been naguiejn gudëdaman niz Samaria. ⁵ Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb. ⁶ Yagaj naj tijb bizëduu rniece reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej. ⁷⁻⁸ Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

⁹ Per guial ad rniesenët lasa' ree bén Israel zagdx con ree bén Samaria, badxi' béngunaa guinan rëbaman:

—¿Chexquiza zeel rniabil nijs lon najl bén Israel awa bén Samaria naj?

(Din bén Israel ree ad rniesenët reeman bén Samaria ree zagdx.) ¹⁰ Badxi' Jesús laan rëbaman:

—Bal zian ragbeel ni rën Dios gunee man lüj, chutëë bénan canab nijs lojl, zanabil nijs lon abi' naj zunen nijs runee guialnaban.

¹¹ Dxel rëb béngunaa guin loj Jesús:

—Dad, ni'quid ca'til ni cwëënël nijs, abi' bizë guin dád naxhitan. ¿Ban chica'l nijs runee guialnaban? ¹² Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

¹³ Badxi' Jesús laan rëbaman:

—Graczi ree bën rë' nijs guie re'c reeman nijs stijb. ¹⁴ Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooman zi'c lod ad rbëzt rajch nijs, abi' nijs guin gudëë guialnaban tiblyaa.

¹⁵ Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tëëtran guidca'n nijs guie.

¹⁶ Rëb Jesús lojman:

—Bignee lacheelil, dxel yaguaadil guie.

¹⁷ Badxi' béngunaa guinan rëbaman:

—Achut da bénguaaawan yu'.

Dxel rëb Jesús:

—Waliquil achut lacheelil yu', ¹⁸ din ma gojc gaay xinguaaaw rtia' lüj, abi' yan xin zojbnël ad lacheeltlan. Zeel waliqui ni nal.

¹⁹ Chi biguiejnman ni rëb Jesús, dxel rëbaman:

—Dad, ma ragbeen guial lüj naj bën rudëë xtiidx Dios loj ree bejn. ²⁰ Dux béngulalan gunajchi' reeman Dios ruguia' guie, per lëjt najdi bën Israel rëbidi guial Jerusalén naj lod guiniajchi' bejn laaman.

²¹ Badxi' Jesúsán rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëëtridi Jerusalén. ²² Lëjt ni'quid ragbeetidi

chunin rniajchi'di, per dunujn rayagbeen chunin ranajchi'n, din loj ree b́en Israel grii b́en güün bejn ree perdon. ²³ Abi' ma bidxin dxej ni gra ree b́en diidxli rniajchi' Dios, guiniajchi' reeman laaman zi'c rayal por xSprijtaman. Din zian r̄en dux Dad ree Dios güün ree b́en rniajchi' laaman. ²⁴ Dios naj Sprijt, abi' b́en rniajchi' ree laaman rayal guiniajchi' reeman laaman con guidib luxdoo reeman por xSprijtaman.

²⁵ Dxel r̄eb b́engunaa guin lojman:

—Naj ragbee gui't b́en naj Mesías, b́en la gajc, Cristo. Abi' chi gui'taman, laaman gusignia' dunuj ree gran.

²⁶ Abi' r̄eb Jesús:

—Najn naj b́en zii, laaman caneenē l̄uj.

²⁷ Loj hor guin badxin ree xbejn Jesús, abi' dád badxaloj reeman guial cayünēman tijb b́engunaa diidx. Per ni'qui tijb reeman ad gunabdiidx lojman xhie r̄enman o xhie diidxan cayü reeman. ²⁸ Guiáad b́engunaa guin basa'n xreman ro' bizē guin, dxel ziaman luguiedx guin, abi' r̄ebaman loj ree bejn:

²⁹ —Gol taquiaa tijb b́en ma na graczi ni ma benan. ¿Nid laaman naj Cristo ya?

³⁰ Dxel brii reeman luguiedx guin zē reeman lod za' Jesús. ³¹ Per la'tgaj zia b́engunaa guin luguiedx guin, r̄eb ree xbejn Jesús lojman:

—Mextr, gudaw.

³² Per r̄ebaman loj reeman:

—Laa da guialrawan yu', ni ad nünbeetidi.

³³ Dxel guzuloj canabdiidx loj lasa' reeman r̄eb reeman:

—¿Ni yu' chu bidnē ni gudawaman ya'n?

³⁴ Dxel r̄eb Jesús loj reeman:

—Da guialrawan naj gūnan zi'c rēn Dios, bēn guxhaal naj abi' guloox gūnan ni naman. ³⁵ Lējt rēb: “Ryaadx zatajp bēew din gac ni yu' loj guiniaa.” Per naj rni lējt: Gol gules lojdi, gol baguiaa loj ree guiniaa, ma naj reen din yado'p reen. ³⁶ Abi' bēn rato'p loj guiniaa guin, rtia'man ni rayalaman por dxiin ni rūjnman. Guiáad ni rato'paman naj par lod yu' guialnaban tiblayaa. Dxel zi'c bēn rxübin zi'c bēn rato'p, rabaa reeman tiblojzi. ³⁷ Waliqini rēb ree bejn: “Ben ren rxübin, ben ren rato'p guialnaza'c.” ³⁸ Naj guxhal lējt din chigto'pidi guialnaza'c lod ad beentidi dxiin. Ben ren ree been dxiin, guiáad lējt gaz bigto'pidi guialnaza'c lod ad beentidi dxiin.

³⁹ Zien ree bēn Samaria bililadx Jesús guial be bēngunaa guin diidx loj reeman rēbaman: “Ma gunaman graczi ni benan.” ⁴⁰ Zeel chi bidxin reeman lod za' Jesús, guzajc reeman laaman liaadx din yaya'nnēman laa reeman. Dxel baya'nnēman laa reeman tio'p dxej. ⁴¹ Abi' mazri zien reeman bililadx laaman chi biguiejn reeman ni rnieeman, ⁴² dxel rēb reeman loj bēngunaa guin:

—Bajy yan ad por ni natzil raliduladxan laaman, nēgajc dunujn ma baguiejn ni rnieeman, abi' rayagbeen walican laaman naj Cristo, bēn yabēē bēnguidxliuj loj dol.

Bayüjn Jesús xi'n xbejn tijb rey

⁴³ Chi goc tio'p dxej guin, baza Jesús niz Samaria abi' zēman niz Galilea, ⁴⁴ majsi laagajcaman rēb guial ni'qui tijb bēn rudēē xtiidx Dios loj ree bejn ad rajpt reeman laaman respejt ladx gajcaman.

⁴⁵ Per chi badxinman niz Galilea, bēn niz ni ree

baca' reeman laaman zagdxe. Din në laa reeman
 wej lanij pascw Jerusalén, abi' baguiaa reeman
 gra ni beenman ni. ⁴⁶ Chi za'man niz ni we-
 jman Caná stijb, lod bayünman nijs vin. Abi'
 luguiedx Capernaum guyu tijb xbejn rey ragxuu
 xi'nman. ⁴⁷ Chi gogbee bën guin baza Jesús
 niz Judea badxinman niz Galilea, wejman lod
 za' Jesús bisajcaman laaman liaadx din cheman
 yayünman xi'nman guial zamer guiëtix. ⁴⁸ Abi' rëb
 Jesús lojman:

—Lëjt, bal id zuguaadi xhie ree sen o milagr ree,
 ad zaliladxtidi.

⁴⁹ Per rëb bën guin:

—Dad, yo' yan gajc, naga gad da xi'nan guiët.

⁵⁰ Dxel rëb Jesús lojman:

—Baguiaj lidxil, ma bayajc xi'nl.

Bililadx bën guin ni rëb Jesús, abi' zia lidxaman.

⁵¹ La'tgaj ziaman, bigchaagloj ree xmojsaman laa-
 man, abi' rëb reeman:

—Ma bayajc xi'nl.

⁵² Dxel gunabdiidxaman loj reeman, rëbaman:

—¿Xhie hor guzuloj banaa da xi'nan?

Abi' rëb reeman lojman:

—Nieey cost raca tijb wadxe bariix xliaa.

⁵³ Dxel basaaladx bën guin guial hor ziin rëb
 Jesús lojman: “Ma bayajc xi'nl.” Abi' laaman në
 gra bën zojb lidxaman bililadx reeman Jesús. ⁵⁴ Ni
 ne naj milagr barojp ni been Jesús niz Galilea chi
 bazaman niz Judea.

5

Bayün Jesús tijb bën ad rajct rza

¹ Chi gudëd gojc zian, guyu tijb xlanij ree bën Israel, abi' wej Jesús Jerusalén. ² Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. ³ Yagaj riga' zien ree bënragxuu, zi'c ree bën lutia'p, nē ree bencoj con ree bën ad rajctzi rza, cabēz reeman guiniib nijs yu' lēn tanc guin. ⁴ Din gocli goc rguiajt tijb xianjl Dios runiibaman nijs guin, abi' bën ru lojnijs guin yaloj chi caniiban, rayajcaman xhietēz guialguijdxan rajcaman. ⁵ Dxel loj ree bën guin no'ch tijb bejn, ma gojc zi'ctiubichoon ijz ragxuuman. ⁶ Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rēbaman:

—¿Rēnl ya yayajquil?

⁷ Badxi' bënragxuu guinan rēbaman:

—Dad, achut ra'pan gudxe' naj loj nijs guin chi riniiban. Beegaj chi rēnan gayu'n, yalojl ben ren ru.

⁸ Dxel rēb Jesús lojman:

—Bixche, baca' ni naal loj, baguiaj.

⁹ Loj hor guin gajc bayajc bën guin, baca' ni naaman loj abi' guzuloj cazaman. Per guial dxej zii naj dxej raziiladx ree bën Israel, ¹⁰ zianz bën Israel zinal ree ley rēb reeman loj bën bayajc guin:

—Yandxej naj dxej raziiladx bejn, ad zajct yaca' ni go'til loj.

¹¹ Badxi' bën guinan rēbaman:

—Bën bayūjn naj naman: “Baca' ni naal loj, baguiaj.”

¹² Dxel gunabdiidx reeman lojman rēb reeman:

—¿Chu na lojl: “Baca' ni naal loj, baguiaj”?

¹³ Per b́en guin ad ragbeetaman chunin bayüjn laaman guial bi'ch Jesús loj ree benzien riga' yagaj. ¹⁴ Chi badxaag Jesús laaman lèn yadooro' Jerusalén, abi' rēbaman lojman:

—Baguiaa ma bayajquil, ad güünril dol chitēē gaquil mazri guial loj ni goquil.

¹⁵ Dxel zia b́en guin abi' biguiedxaman loj ree b́en Israel guial Jesús naj b́en bayüjn laaman.

¹⁶ Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. ¹⁷ Per rēb Jesús loj reeman:

—Da Dadan Dios ad rbēzt rüjnman ni rayal güünman, zeel nēgajc naj rün zi'c rüjnman.

¹⁸ Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, nē guial rüjn laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹ Rēb Jesús loj reeman:

—Diidxiczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. ²⁰ Din Dios rēn xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi. ²¹ Din zi'c rasban Dios bengüt ree rudēē tēēman guialnaban loj reeman, ziangajc rudēē xi'nman guialnaban loj ree b́en nüjnman xgab. ²² Abi' ad Diost rüjn guialguxtis, bazuj xi'nman din güünman guialguxtis, ²³ din gap gra ree bejn xi'nman respejt zi'cgajc rajp reeman laaman respejt. B́en ad rajpt Xi'n Dios respejt,

ad rajp gajctaman respejt xDadaman Dios, b́en guxhaal laaman.

²⁴Diidxliczi rnin: B́en ruzoob da diidxan rililadx t́eeman Dios, b́en guxhaal naj, laaman ma rajp guialnaban tiblayaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman. ²⁵Diidxliczi rnin ma bidxin hor, abi' yandxej gajcan, b́en naj ree zi'c bengüt loj Dios gucaagdiajg reeman cha' xi'nman. Abi' ree b́en guzoob xtiidxaman zajp reeman guialnaban tiblayaa con Dios. ²⁶Din zi'c rajp Dios guialnaban, lasa'gajc guialnaban guin ma badëe loj xi'nman, ²⁷abi' badëeman guialrniabee lojman din güünman guialguxtis, din laaman naj B́en guxhaal Dios loj guidxliuj. ²⁸Ad bal radxa lojdi ni rnin, din zadxin dxej guien gra ree bengüt cha' Xi'n Dios, ²⁹abi' yarii reeman lën baa. Dxel b́en been ree ni ruladx Dios, yaban reeman, din gap reeman guialnaban tiblayaa con laaman. Guiáad ree b́en been ni mal, yaban reeman din yayal reeman casti ni rayal reeman.

Ni ruliüü guialrniabee rajp Jesús

³⁰Achet zajc günan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaban, rünanan zi'c rën da Dadan b́en guxhaal naj. ³¹Bal gü da diidx gajcan, achet lasajcan. ³²Per yu' ben ren rü da diidxan, abi' ragbeechaawan guial diidxlin. ³³Lëjt guxhaal b́en bignabdiidx ree loj Waj, abi' laaman ganax ni diidxli gunaman. ³⁴Majsi ad ryaadxt yadxi'n ni gunee ree bejn por naj, per canin lojdi ni guna Waj din chililadxidi

gap tëedi perdon. ³⁵ Waj goc zi'cgajczi tijb bajl ni re'c abi' rusnin, guiáad lëjt dád babaadi bidxga'di tijb tiamp ni balüüman lëjt. ³⁶ Per naj mazri naj ni gulün lëjt guial loj ni balüü Waj lëjt por naj. Din ni na da Dadan Dios gūnan, laanan cayūnan yan din guiguien guial diidxli laaman guxhaal naj. ³⁷ Nē da Dadan bēn guxhaal naj, laagajcaman be da di-idxan, majsi ad waguiejntidi cha'man ad waguiaa tēētidi laaman. ³⁸ Ad yu'guijc tēētidi xtiidxaman zeel ad rliladxtidi bēn guxhaalaman. ³⁹ Lëjt con cudad da't roolidi loj xtiidx Dios, guial ragbeedi con laan gapidi guialnaban tiblyaa con Dios. Abi' majsi loj xtiidx gajcaman ruza't naj, ⁴⁰ per ad rēntidi chililadxidi naj din gapidi guialnaban guin.

⁴¹ 'Naj ad raguiltan guilies ree bejn da valoran. ⁴² Abi' ragbeechaawan guial ad walit rēndi Dios. ⁴³ Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. ⁴⁴ ¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdxe loj bēn naj tijbzi Dios. ⁴⁵ Ad bal naladxidi naj gabec xguialquiadi loj Dios, din bēn cwe'c xguialquiadi naj Moisejs, bēn rbēzidi gūün lëjt yudar. ⁴⁶ Bal bililadxidi ni rēb Moisejs, nē naj zaliladxidi, din Moisejs baca loj xtiidx Dios lod ruza't naj. ⁴⁷ Per bal id rliladxidi ni bacaaman, ¿xoza chililadxidi ni rnin lëjt?

6

*Bayaan Jesús gaay mil bejn
(Mt. 14:13-21; Mr. 6:30-44; Lc. 9:10-17)*

¹ Chi gudëd gojc zian, dxel zë Jesús stiblad ro'nijsdoo riga' niz Galilea, nijsdoo la gajc Tiberias. ² Bénguixiuj binal laaman, guial ruguiaa reeman milagr ree ni rüjnman rayüjnman bénragxuu ree. ³ Dxel wë'paman tijb ruguia' abi' gurenë ree xbejnman. ⁴ Dxejzii ree ma zidyob pascw, xlanij ree bén Israel. ⁵ Chi gules loj Jesús, abi' baguiaaman zëed ree bénguixiuj lod za'man, dxel rëbaman loj Felip:

—¿Ban yusii ree ni gaw gra ree bén guin?

⁶ Per rëbzaman zian din guidoon xhie guiëb Felip, din Jesús mal ragbeeman xhie güünman. ⁷ Dxel badxi' Felipan rëbaman:

—Ni'qui ni rüjn bejn gan loj xhujn bëëw ad zadaant yo' guiadxtil din gaw tijbgaj reeman majs i tibia'dogajzan.

⁸ Dxel gunee stijb xbejn Jesús, bén la Andrejs bijch Simón Bëd, rëbaman:

⁹ —Laa tijb xindo ca' gaay guiadxtil con zatio'p bëjl za' guie. Per, ¿të'czi taan ni guin par gra bén guin?

¹⁰ Dxel rëb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw.

¹¹ Dxel cwa' Jesús guiadxtil guin ree. Chi gulox badëëman quixtëë loj Dios, badëëman laa reen loj ree xbejnman persi gudi's reeman laa reen loj gra ree bén zojb yagaj. Ziangajc beenman con ree bëjl guin, badëëman laa reen zi'ctzi guyën reeman.

¹² Chi ma bixienladx reeman, dxel rëbaman loj ree xbejnman:

—Gol bato'p gra ree ni laay baya'n, chitëë xhie guizëëb.

¹³ Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin. ¹⁴ Chi baguiaa ree bejn milagr narooob ni been Jesús, rëb reeman:

—Walican bén guin naj bén rudëë xtiidx Dios loj ree bejn, bén naj gui't loj guidxliuj.

¹⁵ Per gogbee Jesús guial rën reeman chinë naguiejn reeman laaman din güün reeman laaman rey, dxel bazaman yagaj, wë'paman mazri ladya guiyc guia' guin, lod su xtijbaman.

Rza Jesús lonijsdoo

(Mt. 14:22-27; Mr. 6:45-52)

¹⁶ Chi ma cabej guiaal, biguiajt ree xbejn Jesús ro'nijsdoo, ¹⁷ guyu reeman loj tijb barcw, abi' cadëd reeman loj nijs guin din guidxin reeman Capernaum. Ma bicajy, guiáad Jesús gadaman yadxin. ¹⁸ Dxel guzuloj cabi' bidoxh abi' wajs xtüjp nijs guin. ¹⁹ Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman.

²⁰ Per rëbaman loj reeman:

—¡Najn, ad rdxebidi!

²¹ Dxel guyën reeman niuman loj barcw guin, per hor guin gajc bidxin reeman lod zë reeman.

Bigdiil ree bén bayaan Jesús laaman

²² Chi bareguiaal, bén riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman. ²³ Loj hor zii bidxin ree barcw ren za guiedx Tiberias, gajxh lod gudaw

reeman guiadxtil chi gulox badëed Jesús quixtëe loj Dios. ²⁴ Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

Jesús naj bén rudëed guialnaban

²⁵ Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

²⁶ Badxi' Jesús san rëbaman:

—Ragbeechaawan, raguilidi naj guial gudawidi xt bigdxinlaxidi, ad guial baguiaatidi milagr ree ni rünan. ²⁷ Ad chu'di xgab guialraw rara, gol guyu xgab guialraw runee guialnaban tiblayaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

²⁸ Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

²⁹ Badxi' Jesús laan rëbaman:

—Ni rën Dios güündi naj guial chililadxidi bén guxhaalaman loj guidxliuj.

³⁰ Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëe ree milagr rüjnl? ³¹ Dux béngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëëman guiadxtil biajb xanyabaa loj reeman gudaw reeman.”

³² Badxi' Jesús laan rëbaman:

—Naj rni lojdi: Ad Moisejst badëed guiadxtil guin, da Dadan naj bén runee quijb guiadxtil za

xanyabaa. ³³ Guiadxtil runee Dios, laan bi't diizd xanyabaa abi' runeen guialnaban loj bénguidxliuj.

³⁴ Abi' rëb reeman lojman:

—Dad, banee guiadxtil guin du lojn zianczi.

³⁵ Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc bén chililadx naj, ad yu't dxej che'caman nijs. ³⁶ Per zi'c rnin lojdi, majsi ma baguiaadi naj, ad rliladx-tidi naj. ³⁷ Gra ree bén ma banee da Dadan lon, gui't reeman lon, abi' bén gui't lon, ad zasiejctan laaman. ³⁸ Din naj zial diizd xanyabaa, zidgaguienan zi'c rën da Dadan bén guxhaal naj, ad par güntan zi'c rënan. ³⁹ Da Dadan bén guxhaal naj, ni rënman naj guial gra ree bén baneeman lon ni'qui tijb reeman ad zunijttan, rënman yasbanan laa reeman chi nit guidxliuj. ⁴⁰ Din rënman guial gra ree bén yayagbee Xi'nman chililadx tëë reeman laaman, gap reeman guialnaban tiblayaa con laaman, guiáad naj yasban laa reeman chi nit guidxliuj.

⁴¹ Dxel guzuloj ree bén Israel caneeguijdx reeman Jesús, guial rëbaman: “Naj naj guiadxtil ni biguiajt diizd xanyabaa.” ⁴² Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtix?

⁴³ Dxel rëb Jesús:

—Gol bacwëëz rnieeguijdxidi naj loj lasa'di.

⁴⁴ Dios naj bén guxhaal naj. Achut zile' gui't lon bal id zëëdaman por da Dadan, abi' naj yasban laaman chi nit guidxliuj. ⁴⁵ Loj ree libr ni bacaa

ree b́en badēē xtiidx Dios loj ree bejn, rēb: “Dios gulüü gra ree bejn.” Zeel gra ree b́en rucaagdiajg xtiidxaman, rusiid tēē reeman ni rulüüman laa reeman, laa reeman zēēd lon.

⁴⁶ 'Achutdzi waguiaa da Dadan Dios, tijbzi b́en guxhaalaman loj guidxliuj ma baguiaa laaman. ⁴⁷ Diidxliczi rnin, b́en rlliladx naj rajpaman guialnaban tiblayaa con Dios. ⁴⁸ Naj naj guiadxtil ni runee guialnaban. ⁴⁹ Xbéngulalidi gudaw mana loj yujbidx, per ni'czi zian güjt gajc reeman. ⁵⁰ Per naj canin lojdi xcwent guiadxtil za xanyabaa, b́en gaw laan gapaman guialnaban tiblayaa con Dios. ⁵¹ Naj naj guiadxtil naban ni biyajb diizd xanyabaa. B́en gaw guiadxtil guie zajpaman guialnaban tiblayaa con Dios. Guiadxtil ni rudēdan, laan naj quijb da cuerpan, gudēdanan din gap ree bénguidxliuj guialnaban.

⁵² Dxel guzuloj ree b́en Israel guin cadildiidx reeman, rēb reeman:

—¿Xhienaag gunee xin guin xcuerpiz yadaaw ree?

⁵³ Abi' rēb Jesús loj reeman:

—Naj rni lējt, bal id zajwidi xcuerp B́en guxhaal Dios, bal id zē' tēēdi xrejnman, ad zajptidi guialnaban. ⁵⁴ Per b́en gaw da cuerpan guiē' tēēman da rejnan, zajpaman guialnaban tiblayaa con Dios, abi' naj yasban laaman chi nit guidxliuj. ⁵⁵ Din da cuerpan naj quijb guialraw, guiáad da rejnan naj quijb ni guiē' bejn. ⁵⁶ Abi' b́en raw da cuerpan rē' tēēman da rejnan, laaman nabannē naj, guiáad naj nabannē' laaman. ⁵⁷ Da Dadan b́en guxhaal naj, rajpaman guialnaban, abi' naj naban por

laaman. Ziangajc b́en gaw da cuerpan, zajpaman guialnaban tiblayaa con Dios por naj. ⁵⁸ Naj cani xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xb́engulalidi, din laa reeman majsi gudaw reeman mana guin, per ǵj́t gajc reeman. Guiáad b́en gaw guiadxtil guie zajpaman guialnaban tiblayaa con Dios.

⁵⁹ Zian balüü Jesús bejn ree lén yadoo Capernaum.

Diidx runee guialnaban tiblayaa

⁶⁰ Chi gulox bacaagdiajg reeman ni balüü Jesús laa reeman, zien ree b́en zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

⁶¹ Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya? ⁶² ¿Xhieza güüнди bal guguaadi Bén guxhaal Dios yayë'paman lod guzuman gocli? ⁶³ Tijbzi por xSprijt Dios rajp bejn guialnaban tiblayaa, bejn ad zile't güün laazaman xhienin. Abi' naj por xSprijt Dios zëed ree diidx ni gunen lojdi, por ree diidx guin rajp bejn guialnaban. ⁶⁴ Per lëjt yu'di ad waliladxt.

Rëb Jesús zian guial ragbeechaawaman diizd yaloj chu ree ad rliladxt laaman chu tëë yayü laaman. ⁶⁵ Rëb tëëman loj reeman:

—Zeel ma rnin lojdi guial achut zile' gui't lon bal id zëëdaman por da Dadan Dios.

⁶⁶ Diizd nadxel, zien ree b́en zinal Jesús guro'nladx laaman, abi' ad guzanëtri reeman laaman. ⁶⁷ Dxel rëb Jesús loj guidxiptio'p ree xbejnman:

—¿Në lëjt rën yaguiaj ya?

⁶⁸ Per badxi' Simón Béd laan, rëbaman:

—Dad, ¿chu loj yo'n? Awa xtiidxil zidnë guialnaban tiblyaaa con Dios. ⁶⁹ Dunujn ma baliduladx rayagbee tëen guial lüj naj Cristo, Xi'n Dios naban.

⁷⁰ Dxel rëb Jesús loj reeman:

—¿Nid naj gule guidxiptio'pidi ya? Abi' yan tijb gajqui lëjt naj zi'c xindxab.

⁷¹ Rëb Jesús zian por Judas Iscariote, xi'n Simón, din Judas guin naj bën bayü laaman, majsi tijb gajc xbejnman najman.

7

Ad rliadxt ree bijch Jesús laaman

¹ Chi gudëd gojc zian, wej Jesús loj ree guiedx riga' niz Galilea. Ad guyëntaman niejman niz Judea, guial cayguiil ree bën Judea guin laaman din gugüjt reeman laaman. ² Per guial ma zidyob lanij ni rüjn ree bën Israel, chi rbej reeman lën ranch, ³ rëb ree bijch Jesús lojman:

—Brii, wej niz Judea, din në ree xbejnl bën riga' ree niz ni guguaa milagr rüjnl. ⁴ Din chi chu rën gagbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

⁵ Gunee ree bijch Jesús zian, guial ni'qui laa reeman ad rliadxt laaman. ⁶ Dxel rëb Jesús loj reeman:

—Ad wadxint da horan, per par lëjt xhietëez horan naj zagdxe. ⁷ Ad zajct guidxe'ch bénguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman. ⁸ Gol wej lanij

guin, sa'n naj ad zazaagajtan, din ad wadxint hor ni gazaan.

⁹ Chi gulox rëbaman loj reeman zian, baya'nman Galilea.

Wej Jesús xlanij ree bën Israel

¹⁰ Chi ma zë ree bijch Jesús, dxel nëman zë lanij guin, per ralanzi zëman chitëë chu gagbee. ¹¹ Per yu' ree bën Israel raguuil laaman loj lanij guin, rëb reeman:

—¿Con bën guin ya'n?

¹² Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

¹³ Per achutczi ruza't laaman loj gra bejn, guial rdxeb reeman guxtis Israel ree.

¹⁴ Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree. ¹⁵ Guiáad ree bën Israel badxaloj reeman, rëb reeman:

—¿Chexc ya'n contzi gra ragbeex, awa ni'quid basiidtix?

¹⁶⁻¹⁷ Dxel rëb Jesús loj reeman:

—Ad guictan carii ni culün lëjt, zëëdan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëëdan por Dios ya. ¹⁸ Bén rulüü ganaxzi ni rbëëguijcaman, rüjnman laan din guilies ree bejn xvaloraman. Per bën rüjn mazri din guilies bejn xvalor Dios, bën guxhaal laaman, laaman rniee ni diidxli, ad rusquieetaman bejn.

19 'Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

20 Badxi' ree bën guinan, rëb reeman:

—Xindxab yu' luxdool. ¿Chuczi rën gugüjt lüj?

21 Abi' rëb Jesús loj reeman:

—Por tijbzi milagr ni benan radxalojdi. 22 Abi' lëjt gunabee Moisejs lëjt guial gra ree xinguaaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn. 23 Yan, bal chitëë gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn? 24 Ad rüjndi xgabal por ni ruguiaazidi rüjn bejn, yaloj xgaj gol gogbee zagdx xhie cayünman.

Rëb Jesús ban zaman

25 Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguuil reeman ya din gugüjt reeman laaman? 26 Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo? 27 Per dunuj ree rayagbeechaaw ban zaman, guiáad chi gui't Cristo, achut gagbee ban saman.

28 Chi biguiejn Jesús zian, la'tgaj culüüman bejn ree lën yadooro' Jerusalén, dxel gunee man rejs rëbaman:

—¡Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. 29 Per naj

nünbee laaman guial zialan diizd lod za'man, laa tēeman guxhaal naj.

³⁰ Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman. ³¹ Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

Guyën reeman niniaaz reeman Jesús

³² Biguiejn ree bënfarisew ni rniee ree bejn Jesús. Abi' laa reeman con ree bixhioz rniabee, guxhaal reeman bën rajp ree ro' yadooro' Jerusalén din guiniaaz reeman Jesús. ³³ Dxel rëb Jesús:

—Ad xchejtri gazunë'n lëjt, dxel yaya'n lod za' bën guxhaal naj. ³⁴ Yaguilidi naj, per ad zadxejl-tidi naj, din ad zile't gui'tidi lod gazun.

³⁵ Abi' ree bën Israel guin guzuloj rniabdiidx loj lasa' reeman, rëb reeman:

—¿Banczi zajc che bën guin din ad zadxejlta-man? ¿Ni zejman lod zobj ree bën Israel loj ree benzit ya, chiglüüman laa reeman në ree bën ad najt bën Israel? ³⁶ ¿Xhie rën guiëb guial naman: “Yaguilidi naj per ad zadxejltan, din ad zile't gui'tidi lod gazun”?

Nijs runee guialnaban

³⁷ Dxej rliox lanij guin naj mazri dxej zobjloj, dxejzii guzuli Jesús gunee man rejs, rëbaman:

—Bal chu lëjt re'c nijs, gol guda lon din guië'dan. ³⁸ Din bën rliladx naj zi'c ca loj xtiidx Dios, lën luxdooman gach nijs runee guialnaban.

³⁹ Chi gunee Jesús zian, rën guiëb xtiidxaman guial gra ree bën chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

Gula' lasa' ree bejn

⁴⁰ Yu' ree bën no'ch loj ree benzien guin, chi bacaagdiajg reeman ni gunee Jesús, rëb reeman:

—Walican, bën guin naj gui't guidgadëë xtiidx Dios loj ree bejn.

⁴¹ Yu'za reeman rëb:

—Bën guin naj bën bacaabee Dios.

Per yu' reeman rëb:

—Ad laataman naj Cristo, din ad niz Galileat naj griiman. ⁴² Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

⁴³ Zian gojc dxel gula' lasa' reeman por Jesús.

⁴⁴ Zien reeman guyën niniaaz laaman, per achut bayax niniaaz laaman.

Ad bililadxt ree guxtis Jesús

⁴⁵ Chi bayejc ree bën rajp ro' yadoo guin lod za' ree bënfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnëtidi laax?

⁴⁶ Dxel rëb ree bën rajp ro' yadoo guin:

—¿Ad goct wayu bën guinee zi'c rnieex!

⁴⁷ Abi' rëb ree bënfarisew guin:

—¿Në lëjt ma cwëjb basquieex lëjt ya? ⁴⁸ ¿Wen yu' ree dux guxtis ree, o bënfarisew ree ma bililadx laax ya? ⁴⁹ ¿Nid ragbeedi ya guial zien ree bën guin banijt loj Dios guial ad nünbeet reeman ley?

⁵⁰ Per b́enfarisew la Nicodemo b́en bignaj Jesús tijb guxhin, rēbaman loj reeman:

⁵¹ —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

⁵² Badxi' reeman laan rēb reeman:

—¿Wen nē lūj za'nē ree b́en Galilea ya? Basiid zagdxe loj xtiidx Dios din gagbeel ad goct warii b́en rudēē xtiidx Dios loj ree bejn niz Galilea.

⁵³ Dxel bare'ch reeman zia lidx lidx reeman.

8

B́engunaa banaaznē xinguaaw ren

¹ Per Jesús zēman ruguia' Olivos. ² Chi bareguiaal, rsil badxinman lēn yadooro' Jerusalén stijb. Zien ree bejn bido'p lod za'man, dxel gurejman guzuloj culūūman laa reeman. ³ Abi' mextr rulūū ree ley con ree b́enfarisew bidxinnē tijb b́engunaa banaaznē tijb xinguaaw, dxel bazuj reeman laaman galay ree b́en guin, ⁴ zianz rēb reeman loj Jesús:

—Mextr, banaaz b́engunaa guie loj mer hor ni yu'nēman xinguaaw ren. ⁵ Abi' loj ley basa'nnē Moisejs dunuj ree ca guial lasa' b́engunaa guie rayal guiētaman con guiaj. ¿Laadx lūj xhie nal?

⁶ Gunabdiidx reeman zian din guidoon xhie guiēbaman din gac gutedia' reeman laaman. Per con basajb lojman abi' guzulojman cucaaman luyuj con xbacwēnman. ⁷ Per guial laa reeman can-abdiidxzi canabdiidx reeman lojman, abi' babejli-man, rēbaman loj reeman:

—Chutëez bén ad wayüjnt dol, yaloj laaman gucaaguiaj béngunaa guie.

⁸ Dxel basajb lojman stijb, basnuu bacaaman luyuj guin. ⁹ Chi biguiejn reeman ni guneeman, guzuloj cayza tijbgaj reeman, diisd mazri bengol xt bara reeman baza. Tijbzi béngunaa guin baya'n con Jesús loj ree bén riga' yagaj. ¹⁰ Dxel babejli-man, rëbaman loj béngunaa guin:

—¿Con ree bén bidnë lüj? ¿Ni'qui tijb reeman achut xhie been lüj ya?

¹¹ Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiaj yan, ad güünril dol.

Jesús naj bajl par bénguidxliuj

¹² Dxel guneé Jesús stijb, rëbaman loj ree bén riga' yagaj:

—Naj naj bajl rusni bénguidxliuj. Abi' bén guzoob da diidxan, zani xquiarguejnman xhienaag gapaman guialnaban tiblayaa con Dios, ad yu' tëet dxej guicajy xquiarguejnman.

¹³ Abi' ree bénfarisew rëb reeman lojman:

—Lüj gajc ruza't lüj, abi' achet lasajc xtiidxil.

¹⁴ Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëe gan, sa'n lëjt ad ragbeetidi ban zialan ban tëe gan. ¹⁵ Lëjt rnieedi bejn zi'ctizi naj xixgabidi, sa'n naj achut ruzatan. ¹⁶ Abi' bal guzatan bejn, ganen diidxli, din ad zanetan zi'c naj da xgaban, në da Dadan bén guxhaal naj ragbee guial diidxli naj ni ganen.

17 Abi' loj xleydi ca guial chi yu' tio'p b́en rniee tiblojzi, diidxliqui naj ni rniee reeman. 18 Yan, naj gajc naj tijb b́en rniee por naj, abi' da Dadan b́en guxhaal naj, naj stijb b́en rniee por naj.

19 Gunabdiidx reeman lojman ŕeb reeman:

—¿Con xdadil?

Badxi'man laan ŕebaman:

—Ĺejt ad núnbeetidi naj, ad núnbee t́eetidi da Dadan, din bal núnbeedi naj, ziangajc núnbeedi da Dadan.

20 Zian gunee Jesús la'tgaj rulüüman bejn ree ĺen yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

Lod gan ad zile't gui'tidi

21 Gunee Jesús stijb, ŕebaman:

—Chi ma gan, zaguiilidi naj, per źejtné xtolidi, din lod gan ad zile't gui'tidi.

22 Dxel ŕeb ree b́en Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

23 Abi' ŕeb Jesús loj reeman:

—Ĺejt naj b́en ladguiajt guie, sa'n naj ladya ni zialan. Ĺejt naj bénguidxliuj, sa'n naj ad bénguidxliujt naj. 24 Zeel rnin, źejtné xtolidi. Din bal id zaliladxidi guial naj naj b́en najn, źejtné xtolidi.

25 Dxel gunabdiidx reeman lojman, ŕeb reeman:

—¿Chuza ĺüj?

Badxi'man laan ŕebaman:

—Ma rnin lojdi diizd yaløj. 26 Zien ni ra'pan gulün ĺejt ni ganené' t́een ĺejt. Per naj, ni canen loj bénguidxliuj naj ni rucagdiagan rniee b́en guxhaal naj, abi' ni rnieeman naj diidxli.

²⁷ Per laa reeman ad gogbeet guial Diosan ruza'taman. ²⁸ Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëëdi guial achetczi rünan por da xgabzan, naj rnie ni ma balüü da Dadan naj. ²⁹ Din laaman guxhaal naj, laaman za' con naj, abi' ad yu't dxej cwëëladxaman naj, guial zianczi rünan ni rayuladxaman.

³⁰ Chi rëb Jesús zian, zien ree bejn bililadx laaman.

Bén wali naj xbejn Dios

³¹ Rëb Jesús loj ree bén Israel bililadx laaman:

—Bal gusnuu guzoobidi da diidxan, waliqui najdi da bejnan, ³² abi' zünbeedi conin naj diidxli, abi' por diidxli guin zalaadi.

³³ Badxi' reeman laan rëb reeman:

—Dunujn zio'p loj xdiaa Abraham, abi' ad yu't dxej wayajcan zi'c bén nado'. ¿Chexquiza zeel nal du lojn, guial por diidxli zalaan?

³⁴ Dxel rëbaman loj reeman:

—Diidxli rnin lojdi, guial graczi bén rüjn ganaxzi dol, laa reeman naj zi'c bén nado' loj dol.

³⁵ Abi' tijb bén nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan. ³⁶ Zeel bal Xi'nman guslaa lëjt, ad najtridi zi'c bén nado'. ³⁷ Ma qui ragbeen guial loj xdiaa Abraham zëëdidi, per lëjt rën gugüjt naj guial ad rayuladxtidi da diidxan.

³⁸ Naj rni ni ma balüü da Dadan naj, sa'n lëjt rüjndi zi'c na xDadidi güüdi.

³⁹ Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman. ⁴⁰ Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nüjnman zian! ⁴¹ Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunujn achut mazri xi'n nayajcan. Tijbzi Dios naj dux Dadan.

⁴² Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bén guxhaal naj. ⁴³ Abi' ad rignia'tidi ni rnin, guial ad rëntidi gucaagdiajguidi da diidxan. ⁴⁴ XDadidi naj xindxab, abi' rüjndi zi'c rënx güüdi, din diizd yaløj ruladx xindxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëex xdad guialrusquiee. ⁴⁵ Per guial naj rni lëjt ganax diidxli, ad rliladxtidi naj. ⁴⁶ ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliladxtidi naj? ⁴⁷ Bén naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

⁴⁸ Dxel rëb ree bén Israel guin loj Jesús:

—Waliqui ni ranan guial xindxab yu' luxdool naj tël bén Samaria.

⁴⁹ Badxi'man laan rëbaman:

—Achut xindxab yu' luxdon, naj cuzob xtiidx da Dadan, per lëjt ganax diidxguijdx rnieedi naj.

⁵⁰ Naj ad raguiltan guilies ree bejn da valoran, majsi yu' b́en ŕen ǵuun bejn zian, abi' laaman ŕujn xguialguxtis. ⁵¹ Diidxli rnin ĺejt, b́en guzoob da diidxan, ad yu't dxej guiétaman.

⁵² Dxel ŕeb ree b́en Israel guin lojman:

—Yanri ma rayagbeecheawan guial xindxabqui yu' luxdool. Abraham ńe gra ree b́en bad́eé xtiidx Dios loj ree bejn, ǵujt reeman, guiáad ĺuj nal: “B́en guzoob da diidxan, ad yu't dxej guiétaman.”

⁵³ ¿Wen mazri lasajquil ya guial loj dux b́engulal ree Abraham? Ǵujtaman, ǵujt t́eé ree b́en bad́eé xtiidx Dios loj ree bejn. ¿Laadx ĺuj chu naladxil naj?

⁵⁴ Abi' ŕeb Jesús loj reeman:

—Bal naj gajc gales da valoran, achet lasajc ni ganen por naj. Per b́en ŕlies da valoran naj da Dadan, b́en nagajquidi naj xDiosidi. ⁵⁵ Ĺejt ad núnbeetidi laaman, sa'n naj núnbeen laaman. Abi' bal ganin ad núnbeetan laaman, ńegajc naj ma naj b́en rusquiee zi'cgajc ĺejt. Per núnbeen laaman abi' ruzoban xtiidxaman. ⁵⁶ Xb́engulalidi Abraham, babaaman guial guguaaman dxej ni guialan. Abi' chi baguaaman dxej guin, mazri babaaman.

⁵⁷ Dxel ŕeb ree b́en Israel guin lojman:

—Ni'qui gadil chu' t́u'p'chii ijz, ¿guiáad ĺuj ya nal baguiaal Abraham?

⁵⁸ Abi' guneé Jesús ŕebaman:

—Diidxli rnin lojdi, mal nabanán chi gad Abraham chu'.

⁵⁹ Dxel gules reeman guiaj din nucaa reeman laan Jesús. Per laa guźeéb gajcaman galay ree bejn, abi' gudédaman galay reeman bariiman ĺen yadoo guin, laa zia gajcaman.

9

Rayüjn Jesús tijb xin ad ranit loj

¹ Chi cadöd Jesús tiblajt, baguiaaman tijb xin ad ranit loj diizd chi golix. ² Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bén guin diizd chi golaman? ¿Por xtol ree xDadaman ya, o por xtol gajcaman?

³ Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlaman zian din chi yayajcaman, guguaa ree bejn xguialrniabee narooob Dios.

⁴ Yan, la'tgaj yu' tiamp, rüjn naguiejn yaguieen ree ni na bén guxhaal naj, din ma yayaaloj tiamp ni achetri zajc gac. ⁵ Abi' la'tgaj za'n loj guidxliuj guie, naj naj bajl rusni bénguidxliuj.

⁶ Chi gulox guneeaman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin. ⁷ Abi' rëbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx.

⁸ Dxel bén zojb ree gajxh lod zojbix con ree bén ragbee guial laax rniab carda, rëb reeman:

—¿Nid xin guinan rbej rniab carda ya?

⁹ Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

¹⁰ Dxel gunabdiidx reeman lojx, rëb reeman:

—¿Xhieza naag gojc bani lojl?

¹¹ Badxi'xan, rëbix:

—Bén la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

¹² Abi' rëb reeman lojx:

—¿Conzaman yan?

Zeel rëbix:

—Ad ragbeetan.

Gunabdiidx ree bénfarisew loj xin guin xhienaag guzuloj rani lojx

¹³ Loj hor zii binë reeman xin bayajc guiaaloj guin loj ree bénfarisew, ¹⁴ din dxej been Jesús bajn persi bayüjnman guiaaloj xin guin, dxej guin raziiladx ree bejn. ¹⁵ Dxel gunabdiidx ree bénfarisew guin lojx xhienaag guzuloj rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

¹⁶ Yu' ree bénfarisew guin rëb:

—Bén bayüjn guiaalojl ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güünman milagr guie ree, bal najman bëndol?

Garent garen rëb reeman. ¹⁷ Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bén bayüjn guiaalojl?

Badxi'xan rëbix:

—Naj rni guial laaman naj bén rudëë xtiidx Dios loj ree bejn.

¹⁸ Per bén Israel guin ree ad rliladxt reeman, din ad banit lojx abi' yan ma ranin, dxel gurejdx

reeman xdadix con xniaax, ¹⁹ abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojlíx? Yan, ¿xhienaag gojc zeel ma ruguiaax?

²⁰ Badxi' reeman laan rëb reeman:

—Dunujn rayagbee guial du xi'nanan, rayagbee tëen guial diizd chi golix ad ranit lojx. ²¹ Per ad rayagbeetan xhienaag gojc zeel rani lojx, ad rayagbee tëetan chu bayüjn guiaalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.

²² Rëb ree xdadix zian guial rdxeb reeman xguxtis ree bën Israel, din ma baya'n reeman diidx, chutëez bën guiëb guial Jesús naj Cristo, ad zatiëjbtri reeman chu'man lën yadoo. ²³ Zianan zeel rëb reeman: “Gol gunabdiidx lojx, ma najx xingol.”

²⁴ Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunujn rayagbee guial bëndol naj bën bayüjn lüj.

²⁵ Badxi'xan rëbix:

—Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.

²⁶ Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhienaag beenman persi rani lojl?

²⁷ Badxi'xan rëbix:

—Ma rnin lojdi, abi' lëjt ad rliladxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?

²⁸ Dxel gudilë reeman laax rëb reeman:

—Lüj bal najl xbejnman, sa'n dunujn xbejn Moisejs nayajcan. ²⁹ Din dunujn rayagbee Dios gunee Moisejs, per bën guin ni'quid rayagbeetan ban zaman.

³⁰ Badxi'xan rëbix:

—¿Xhiechalnin zeel ad ragbeetidi ban zaman! Guiáad naj por laaman ma rani lon. ³¹ Dunuj ree rayagbeechaaw guial ad ridxga't Dios xtiidx ree bëndol, ridxga'man xtiidx ree bën ruzoob xtiidxaman rüjn tëe reeman zi'c rënman. ³² Ad goct wacaagdiajg ree guial chu' bën yayüjn loj bën ad ranit loj diizd gojlaman. ³³ Yan, bal id por Dios zëed bën guin, achetczi nile' nünman.

³⁴ Dxel rëb reeman lojx:

—Lüj gojl con dol, ¿wed lüj gulüü dunujn?
Abi' babëe reeman laax yagaj.

Bililadx xin bayajc guin Jesús

³⁵ Gogbee Jesús ni guzac xin bayüjnman, dxel chi badxaagaman laax, rëbaman lojx:

—¿Rliladxil bën guxhaal Dios loj guidxliuj ya?

³⁶ Badxi'xan rëbix:

—Dad, guna chunin, din chililadxan laaman.

³⁷ Dxel rëbaman lojx:

—Ma baguiaal laaman, laaman naj bën ca-
neenël.

³⁸ Abi' bazuxib xin guin lojman, rëbix:

—Rliladxan lüj, Dad.

³⁹ Zianz rëb Jesús:

—Bialan loj guidxliuj guie din günan guialguxtis, din por naj yani loj ree bën ad ranit loj, guiáad ree bën rani loj, ad zanit loj reeman.

⁴⁰ Yu' ree bënfarisew za'në laaman. Chi biguiejn reeman rëbaman zian, rëb reeman:

—¿Wen në dunujn ad ranit duloj ya?

⁴¹ Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

10

Bén rniaj xiil

¹ Rëb tëë Jesús:

—Diidxliczi rnin lojdi, bén ad rut niz ro' xgurajl ree xiil, bén ru niz lood ren, laaman naj béngubaan.

² Per bén ru niz ro' xgurajl reeb, laaman naj bén rniaj laa reeb. ³ Abi' rxhial bén rajp ro' xgurajl reeb persi ru bén rniaj laa reeb, abi' chi rbejdxa-man tijbgaj reeb, rayünbee reeb cha'man. Zianz rbëëman laa reeb lën gurajl guin. ⁴ Abi' chi ma brii gra reeb, dxel rnedaman loj reeb, guiáad laa reeb rnal laaman, guial nünbee reeb cha'man. ⁵ Per ad rnalt reeb tijb bén ad nünbeet reeb, ruxüünl reeb lojman, guial ad nünbeet reeb cha'man.

⁶ Chi gulox gunee Jesús zian, ad bignia't ree bén riga' yagaj xhie rën guiëb ni guneman.

Jesús naj zi'c bén rniaj xiil ree zagdxë

⁷ Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. ⁸ Gra ree bén bi't chi gad naj guial naj reeman zi'c béngubaan, rban reeman rusagzi tëë reeman. Per ree bén naj da bejnan ad bidxga't reeman laa reeman. ⁹ Naj naj ro' port, abi' bén ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

10 'Béngubaan ri'tzaman din cwanman, gugüjtaman gunijt tēēman, sa'n naj zialan din gapidi guialnaban, gap tēēdi zro' da'tan. 11 Naj naj zi'c tijb bēn rniaj xiil ree zagdxē. Abi' bēn rniaj xiil ree zagdxē xt xguialnabanman rudēēman por laa reeb. 12 Per bēn rniaj laa reeb por milia, chi ruguiaaman zēēd cuyojt, laa ruxüün gajcaman, rbēēladxaman xiil guin ree guial ad najt reeb xi xiilaman nē guial ad najtaman bēn rniaj ree xiil, dxel rniaaz cuyojt guin laa reeb abi' rtie'chib laa reeb. 13 Laaman rbēēladx laa reeb, din por miliazi rniajman laa reeb abi' achet naladxaman por laa reeb.

14-15 'Naj naj zi'c bēn rniaj xiil ree zagdxē. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanman gudēdan por laa reeb. 16 Ra'p tēēn stibcwaa ree xiil ad yu't lēn gurajl guie. Nē laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

17 'Da Dadan Dios rēnman naj guial naj gajc rudē naj guiētan par yabanan stijb. 18 Achut zajc gugüjt naj bal id naj gatiēēb. Naj ra'p guialrniabee par gatiēēban guiētan nē par yabanan stijb, din laan naj guialrniabee ni banee da Dadan lon.

19 Chi biguiejn ree bēn Israel guin ni rēbaman, gojc reeman tio'p lala' stijb. 20 Zien reeman rēb:

—¿Chexc zeel ridxga'di laaman? Awa xindxab yu' luxdooman rajc tēē guijcaman.

21 Per yu' reeman rēb:

—Ni'qui tijb bén yu' xindxab luxdoo ad rnieet zian. ¿Wen zajc yaxhal xindxab guiaaloj ree bén ad ranit loj ya?

Jesús con xDadaman Dios naj reeman tijbzi

²² Tiamp nayaag, chi cayüjn ree bén Israel lanij ni rüjn reeman gazobijz par yadooro' Jerusalén. ²³ Wej Jesús lën yadoo guin. Chi cazaman niz ro' curdur ni rniee reeman xcurdur Salomón. ²⁴ Dxel biyaw ree bén Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

²⁵ Badxi' Jesúsán rëbaman:

—Ma rnin lojdi, per lëjt ad rliladxtidi naj. Abi' ree ni rünan con xguialrniabee da Dadan Dios, laa reen rulüü chu najn. ²⁶ Per ad rliladxtidi, guial ad najtidi da bejnan. ²⁷ Bén naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj. ²⁸ Naj rudë guialnaban tiblayaa loj reeman, ad yu't dxej nit reeman. Abi' achut zajc chiquied laa reeman lon. ²⁹ Din da Dadan, bén banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. ³⁰ Da Dadan con naj, nayajcan tijbzi.

³¹ Dxel cwa' ree bén Israel guin guiaj din gucaaguaiaj reeman Jesús. ³² Per rëbaman loj reeman:

—Por xguialrniabee da Dadan, zien ni zagdxe ma benan niz lojdi. ¿Con pornin gucaaguaiajdi naj?

³³ Badxi' reeman laan rëb reeman:

—Ad por ree ni zagdxe ni beentilan yacaaguaiajn lüj, yacaaguaiajn lüj guial ad rajptil Dios respejt, din bénguidxliujzi lüj, abi' rüjn lüj gajc zi'c Dios.

³⁴ Dxel rëb Jesús:

—Loj xleydi rëb: “Naj rni guial lëjt naj dios.”

³⁵ Dunuj ree rayagbee guial ad ni rusquieet naj ni ca loj xtiidx Díos. Abi' laaman gulëëljaj dios bën basa'nnë ree xtiidxaman, bën gojp ree guialrniabee loj ree bën Israel. ³⁶ Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj? ³⁷ Bal id cayünan zi'c na da Dadan, ad chililadxidi naj. ³⁸ Per bal cayünan zi'c naman, majsi ad zaliladxtidi naj, per gol bililadx guial por laaman zëed ni rünan din gagbeedi guial da Dadan za'në naj, guiáad naj za'në'n laaman.

³⁹ Dxel guyën reeman niniaaz reeman Jesús, per gulaaman loj reeman.

⁴⁰ Abi' zëman zatiblad ro' guiw Jordán, lod baroobnijs Waj bejn ree yaloj, yagaj baya'nman.

⁴¹ Abi' zien ree bën bidxin yagaj rëb:

—Walin, majsi achet milagr been Waj, per gra ni guneeman xcwent bën guie naj diidxli.

⁴² Dád zien reeman bililadx Jesús yagaj.

11

Güjt Lazr

¹ Guyu tijb bënragxuu, brii lajman Lazr. Laaman con re bizanman Li con Mart, naj ladx reeman Betania. ² Abi' Li bizan Lazr, laam baroob perfum guia' Jesús abi' bacwiidximin con guidxguijquim.

³ Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

⁴ Chi biguiejn Jesús zian, rëbaman:

—Guialguijdx guin ad zëédtan par gugüjtan, zëédan din gac guguiaa bejn xguialrniabee Dios në par guguiaa reeman xguialrniabee Xi'n Dios.

⁵ Majsì rën da't Jesús Mart con Li në Lazr, ⁶ per chi cwa'man ruson ragxuu Lazr, sta goglaaman zatio'p dxej lod za'man. ⁷ Dxel rëbaman loj ree xbejnman:

—Yo' ree niz Judea zatijb.

⁸ Abi' rëb reeman lojman:

—Mextr, ad wayajct xchej guyën ree bën zojb niz ni nucaaguaiaj reeman lüj. ¿Abi' chel ni zatijb ya?

⁹ Dxel rëb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie. ¹⁰ Per bën rza guxhin, yu' ni rirejl guia'man, din achet bajl guin rajpaman.

¹¹ Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

¹² Dxel rëb ree xbejnman:

—Dad, bal naayëjsix, rën guiëban yayajquix.

¹³ Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix. ¹⁴ Dxel bagojn Jesús laa reeman, rëbaman:

—Ma güjt Lazr. ¹⁵ Rabaan por lëjt guial ad guzutan ni din chililadxidi naj. Yan, yo' ree yugnaj reex.

¹⁶ Dxel Tumajs, bën rniee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

Jesús naj bén rusban bejn runee tëëman guialnaban

¹⁷ Chi bidxin Jesús Betania, ma gojc tajp dxej biguie'ch Lazr. ¹⁸ Betania guin raya'nan gajxh Jerusalén, zi'ct choon kilometro. ¹⁹ Abi' zien ree bén Israel bignaj Mart con Li din yagu' reeman luxdoo reem guial güjt bizan reem. ²⁰ Chi gogbee Mart ma zëëd Jesús gajxh, briim bigchaaglojm laaman, guiáad Li baya'nm lëñü. ²¹ Dxel rëb Mart loj Jesús:

—Dad, bal nizujl guie, ad ziant niëjt da zanan.

²² Per naj ragbee guial ni'qui yan zunee Dios ni guiniabil lojman.

²³ Dxel rëb Jesús:

—Naj rni yaban bizanl.

²⁴ Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

²⁵ Abi' rëb Jesús:

—Naj naj bén rusban ree bengüt rudë tëën guialnaban loj ree bejn. Bén chililadx naj, majsí guiëtaman, per zajpaman guialnaban loj Dios.

²⁶ Guiáad gra bén naban rliladx tëë naj, zajpaman guialnaban loj Dios. ¿Rliladxil ni canin lüj ya?

²⁷ Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bén naj gui't loj guidxliuj.

Biin Jesús ro' xbaa Lazr

²⁸ Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

²⁹ Biguiejnzi Li zian, laa bisugajquim bigchaaglojm Jesús. ³⁰ Abi' Jesús gadzaman chu' luguiedx guin, sta za'man lod bigchaagloj Mart laaman. ³¹ Guiáad ree bén Israel zojbnë Li ragu' reeman luxdoom, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguiaanm.

³² Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

³³ Chi baguiaaman roon Li con ree bén Israel nal laam, dád gognaa luxdooman guyu naya tëëman.

³⁴ Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguiaal.

³⁵ Dxel biinman. ³⁶ Abi' rëb ree bén Israel guin:

—Gol baguiaa nial dád guyënman laax.

³⁷ Per yu' reeman rëb:

—Bén guinan baxhal guiaaløj tijb bén ad ranit loj. Yan, ¿niche niajc nünman ya'n chitëë niëjt Lazr?

Basban Jesús Lazr

³⁸ Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n. ³⁹ Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

⁴⁰ Badxi' Jesús san rëbaman:

—¿Nid rnin ya, bal rliladxil, guguiaal xguialrniabee Dios?

⁴¹ Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëe lüj guial ma bacaagdiajguil ni rnin. ⁴² Naj ragbeechaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

⁴³ Chi gulox rëbaman zian, dxel guridxa'man rëbaman:

—¿Lazr, barri yagaj!

⁴⁴ Dxel barri Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguaiajx.

Baya'n reeman diidx xhienaag guiniaaz Jesús

(Mt. 26:1-5; Mr. 14:1-2; Lc. 22:1-2)

⁴⁵ Dád zien ree bën binal Li bililadx Jesús, guial baguiaa reeman milagr beenman. ⁴⁶ Per yu' reeman bicojn bënfarisew ree ni been Jesús. ⁴⁷ Dxel bënfarisew ree në ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayüjn xin guin? ⁴⁸ Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

⁴⁹ Per loj reeman yu' bën la Caifás, bixhioz zobjloj rniabee loj ijzsii, rëbaman loj reeman:

—¿Nid ragbeedi ya, ⁵⁰ nid rignia' tëedi ya, zagdxe naj guiët tijbzi bejn por gra bën Israel, luar nit dux nacion ree?

⁵¹ Per Caifás guin ad ni naladxtzaman rëbaman. Guial najman bixhioz zobjloj rniabee loj ijzsii, zeel badëed Dios ni guneeman, guial guiët Jesús por gra

ree b́en Israel. ⁵² Abi' ad por laatzi reeman, par gac reeman tijbzi con gra ree xbejn Dios, b́en riga' ree guidib guidxliuj. ⁵³ Zeel diizd dxejzii baya'n reeman diidx gugüjt reeman Jesús.

⁵⁴ Zianan zeel ad contzi rulüulojtraman loj ree b́en Israel, bazaman yagaj ziaman guiedx la Efraín, najn gajxh yujbidx, yagaj guzuné ree xbejnman.

⁵⁵ Dxejzii ree ma zidyob pascw, lanij rüjn ree b́en Israel, dád zien ree b́en guiedx ree zé Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. ⁵⁶ Dxel raguiil reeman Jesús, abi' rniabdiidx loj lasa' reeman lén yadooro' Jerusalén, rēb reeman:

—¿Xhie nadi? ¿Zi'taman lanij ya o ad zi'ttaman?

⁵⁷ Bénfarisew ree con ree bixhioz rniabee, gunabee reeman bal chutēz b́en ragbee ban za' Jesús, gugojnman din chile' guiniaaz reeman laaman.

12

Baroob Li perfum guia' Jesús (Mt. 26:6-13; Mr. 14:3-9)

¹ Za xho'p dxej riaadx gal pascw, chi we Jesús Betania, lod zojb Lazr, xin basbanman. ² Ni been reeman tijb guialraw par xche ni gudawné reeman Jesús. Mart gule'c guialraw guin, guiáad Lazr naj tijb b́en gurené laa reeman xan mex. ³ Dxel cwa' Li cost garol lijtr perfum ni lasajc wayějx, najcchaawnén ganax nardo, baroobimin guia' Jesús abi' bacwiidxné guidxguijquimin. Guidibczi lēnü guin baree nejxh. ⁴ Dxel Judas Iscariote, xin naj tijb ree xbejn Jesús, xin bayü laaman, rēbix:

⁵ —¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnan yudar bénprob ree.

⁶ Ad guial yu'tix xgab bénprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëë reeman rgu'chaawix. ⁷ Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan. ⁸ Din bénprob guin ree zianczi za'në reeman lëjt, per naj ad ziantczi gazunë'n lëjt.

Baya'n reeman diidx gugüjt reeman Lazr

⁹ Bén guixiuj bén Israel gogbee za' Jesús Betania, abi' wej reeman yagaj, ad par guguiatzi reeman Jesús, në par guguiaa reeman Lazr, xin basbanman. ¹⁰ Zeel baya'n ree bixhioz rniabee diidx guial në Lazr gugüjt reeman. ¹¹ Din por laax dád zien ree bejn cayrii loj reeman, abi' caliladx reeman Jesús.

Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

¹² Chi bareguiaal, zien da't ree bén zë lanij pascw Jerusalén gogbee guidxin Jesús yagaj, ¹³ dxel cwa' reeman zijn, brii reeman bigchaagloj reeman laaman, rbidxa' reeman rëb reeman:

—¡Benza'c bendxoon naj Dios! ¡Nüjnle'man Bén guxhaalaman! ¡Nüjnle'man bén naj rey Israel!

¹⁴ Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

¹⁵ Bén Sión, ad rdxebidi.
Gol baguiaa, laa xreydi zëed,
dxiibaman tijb burdoo.

¹⁶ Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷ Bén guzu ree con Jesús chi guredxaman Lazr din yariix lën baa, basban tēëman laax loj ree bengüt, rusnuu rü reeman diidx loj ree bejn ni baguiaa reeman. ¹⁸ Zeel zien ree bejn brii bigchaagloj laaman, guial gogbee reeman milagr beenman. ¹⁹ Dxel rëb loj lasa' ree bénfarisew:

—Gol baguiaa nial graczi bejn zinal laax, achetri zajc yaguieen ree.

Yu' ree bén grieg raguil Jesús

²⁰ Loj gra ree bén we lanij bignajchi' reeman Dios Jerusalén, no'ch bëlzi ree bén grieg, ²¹ gubig reeman loj Felip, bén za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

²² Abi' wej Felip biguiedxaman loj Andrejs, dxel wej grop reeman bicojn reeman Jesús. ²³ Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman. ²⁴ Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcxhiejn. ²⁵ Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rën Dios, xhietëöz sacaman, zajpaman guialnaban tiblayaa con laaman. ²⁶ Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

Rugojn Jesús guial guiëtaman

²⁷ Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan. ²⁸ Dad, balüü xguialrniabeel.

Dxel biguien cha' bejn xanyabaa rëbaman:

—Ma balü da guialrniabeen, per gulünan stijb!

²⁹ Riguiejn ree bën riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

³⁰ Dxel rëb Jesús:

—Ad por najtan biguien cha' bejn, por lëjtan.

³¹ Ma bidxin dxej gac guialguxtis loj guidxliuj, yan yarii bën rniabee lojn. ³² Per chi guilies reeman naj ya loj guidxliuj guie, dxel gui't graloj bejn lon.

³³ Zian basignia'man xhienaag guiëtaman.

³⁴ Badxi' ree bën guinan rëb reeman:

—Dunujn rayagbee rëb loj ley, Cristo guiban tiblayaa. ¿Chexc zeel nal, rayal guilies reeman Bën zëëd xanyabaa? ¿Chunin naj Bën zëëd xanyabaa?

³⁵ Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bën rza loj xcay, ad ragbeetaman ban cheman. ³⁶ Gol bililadx bajl guie, la'tgaj za'nëdan, din gaquidi xbejnan.

Chi gulox gunee Jesús zian, dxel baquie'chlojman loj reeman.

Ad bililadxt ree bejn Jesús

³⁷ Majsi been Jesús zien da't milagr baguiaa reeman, ad bililadxt reeman. ³⁸ Zian gojc cumplid

ni bacaa Isaías bén badëë xtiidx Dios loj ree bejn, rëban:

Dad, ¿chu ma bililadx rusion radëëdan?

¿Chu loj ma balüü Dios xguialrniabeeman?

³⁹ Zianan zeel ad gojct nililadx reeman, din në ze bacaa Isaías:

⁴⁰ Dios basiaaw guiaaloj reeman,

bascajy tëëman xquiarguiejn reeman,

chitëë guguaa reeman chignia' tëë reeman,

chitëë yadxì' loj reeman lon, abi' ad zayüntan laa reeman.

⁴¹ Rëb Isaías zian guial baguaaman xbiani Jesús, zeel baza'taman laaman.

⁴² Per ni'czi zian, dád zien ree bén zojbloj bililadx Jesús. Per ad rëbt reeman loj ree bejn zian, guial rdxeb reeman yabëë ree bénfarisew laa reeman lod ricaagdiajg reeman xtiidx Dios, ⁴³ din mazri rën reeman guiën ree bejn laa reeman, guial guiën Dios laa reeman.

Rniee Jesús zì'c rniabee xDadaman

⁴⁴ Gunee Jesús rejs rëbaman:

—Bén rliladx naj, ad najtzan rliladxaman, në da Dadan bén guxhaal naj. ⁴⁵ Bén ruguaa naj, në bén guxhaal naj ruguaaman. ⁴⁶ Naj naj bajl, bialan loj guidxliuj guie, chitëë yaya'n ree bén rliladx naj loj xcay. ⁴⁷ Bal chu guien da diidxan abi' ad zu-zoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol. ⁴⁸ Bén ad rënt naj ad rucaagdiajg tëëtaman da diidxan, mal yu' ni gudëed laaman casti: diidx ni rën, laan gudëed laaman casti chi guidxin dxej. ⁴⁹ Din ad ni rbëguictan rnien. Da Dadan, Bén guxhaal naj rniabee ni ganen ni gulü

tëen, ⁵⁰ zeel ragbeen, ni rniabee da Dadan runee guialnaban tiblayaa. Zianan zeel ni rnin rulünan zi'c rniabeeman.

13

Gudiib Jesús guia' ree xbejnman

¹ Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguiaj loj xDadaman. Zianczi guyën ree xbejnman, bën riga' ree loj guidxliuj, rënman laa reeman goctëez. ²⁻⁴ Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bën gugüjt laaman. Ragbee Jesús guial badëed xDadaman gra guialrniabee lojman, laa tëëman guxhaal laaman, zeel yaguiajman lod za'man. La'tgaj cayaw reeman, bisuman xan mex, gulëëman tijb lajd najcwaman luya, dxel cwa'man tijb tuay guxhii xizaman. ⁵ Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tëëman laan con tuay naxii xizaman. ⁶ Chi bayal quiibaman guia' Simón, bën rniece reeman Bëd, rëbaman loj Jesús:

—Dad, ¿lúj quiib guia'n ya?

⁷ Badxi'man laan rëbaman:

—Ad rignia'til ni cayünan yan, per qui chignia'rilan.

⁸ Zeel rëb Bëd lojman:

—Ad zatiëëbtan quiibil guia'n.

Abi' rëb Jesús:

—Bal id zaguiiban guia'l, ad zile'tri gaquil da bejnan.

⁹ Zeel rëb Bëd lojman:

—Dad, ad bal guia'zan quiibil, gudiib në yan con guican.

¹⁰ Badxi'man laan rëbaman:

Bén goznejz guia'zaman riaadx chëd, din guidibaman naya. Abi' lëjt ma nayadi, majsi ad gratidi.

¹¹ Ma ragbeeman chu yayü laaman, zeel rëbaman: “Ad gratidi naya.”

¹² Chi gulox gudiibaman guia' reeman, bayajcw xabaman, gurejman xan mex guin zatijb, dxel rëbaman:

—¿Bignia'di ni benan ya? ¹³ Rnieedi naj Mextr në Dad, waliquididi najn. ¹⁴ Bal najn Mextr në Dad, gudiiban guia'di, ziangajc quiib guia' lasa'di. ¹⁵ Ma balün lëjt, din güüнди zi'c benan. ¹⁶ Diidxliczi ganin, achut mojs naj mazri guial loj bën rniabee laaman, achut bën ri't naj mazri guial loj bën rxhiaal laaman. ¹⁷ Bal rignia'di nine güün tëëdan, yabaanë Dios lëjt.

¹⁸ Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: “Bén rawnë'n tijbzi, bayejcaman contr naj.” ¹⁹ Ma rugojnan lëjt din gagbeedi chi gac zian, din chililadxidi chu najn. ²⁰ Diidxliczi ganin, bën rucaagdiajg ni rëb bën rxhialan, najn rucaagdiajgaman, guiáad bën rucaagdiajg da diidxan, xtiidx bën guxhaal najn rucaagdiajgaman.

Bagojn Jesús chu yayü laaman

(Mt. 26:20-25; Mr. 14:17-21; Lc. 22:21-23)

²¹ Chi gulox gunee Jesús zian, dád guyunayaman, dxel rëbaman loj reeman zagdxé:

—Diidxiczi ganin, tijb lëjt yayü naj loj ree bën gugüjt naj.

²² Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. ²³ Tijb bën guyën da'taman zojb cwë'man, hor zii chi cayaw reeman xche, ²⁴ dxel been Bëd sen lojman din guiniabdiidxaman chunin ruza't Jesús. ²⁵ Zeel mazri gubigaman cwë' Jesús gunabdiidxaman, rëbaman:

—Dad, ¿chunin?

²⁶ Badxi' Jesúsán rëbaman:

—Gugajdxan ta'n guiadxtil, din loj xin gudëdanan, laaxan yayü naj.

Dxel bagajdxaman ta'n guiadxtil badëëman laan loj Judas, xi'n Simón Iscariote. ²⁷ Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

²⁸ Per achutczi ree bën zojb xan mex guin bignia' chexc zeel rëbaman zian. ²⁹ Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'nan loj ree bën rzagdiaj ya. ³⁰ Chi ma gudawix guiadxtil guin, dxel briix, ma guxhin.

Gunabee Jesús tijb nicüb

³¹ Chi ma brii Judas, rëb Jesús loj ree xbejnman:

—Yan guien xguialrniabee Bën guxhaal Dios din gagbee ree bejn xhienaag naj guialrniabee gudëë Dios lojman. ³² Din bal gulüü Bën guxhaal Dios xguialrniabee Dios, ziangajc gulüü Dios xguialrniabeeman, zeel ma gudëëdaman laan. ³³ Xi'n, ad zien dxejtri gazunë'n lëjt, yaguuilidi naj, per zi'cgajc rën loj ree bejn, ziangajc ganin lojdi yan:

Ad zajct chedi lod gan. ³⁴ Ganin tijb nicüb ganabeen: Gol guyën lasa'di zi'c rënan lëjt. ³⁵ Bal guiën lasa'di, zian gagbee gra bejn guial najdi da bejnan.

Guiëb Bëd ad nünbeetaman Jesús

(Mt. 26:31-35; Mr. 14:27-31; Lc. 22:31-34)

³⁶ Gunabdiidx Bëd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

³⁷ Zeel rëb Bëd:

—Dad, ¿chexc zeel ad zajct guidaalan lüj yan? Xt zajc guiëtan por lüj.

³⁸ Badxi' Jesús rëbaman:

—¿Walil ya rënl guiëtil por naj? Diidxliczi ganin, chi gad guïd cwidxa', mal rëbil choon volt, ad nünbeetil naj.

14

Jesús naj nejz guidxinnë bejn loj Dios

¹ Rëb tëë Jesús:

—Ad rudi xgab. Gol bililadx Dios, gol bililadx tëë naj. ² Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. ³ Chi ma benchaawan luar guin, dxel yaguialan guidgaxin lëjt din sudi lod gazun. ⁴ Ma nünbeedi nejz zë lod gan.

⁵ Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

⁶ Badxi'man laan rëbaman:

—Naj naj nejz, najn diidxli, naj tēen guialnaban. Tijbzi naj zajc chinē' bejn ree loj da Dadan. ⁷ Bal nünbeedi naj, nē da Dadan güünbeedi. Per ma nünbeedi laaman diidz yan, din ma baguiaadi laaman.

⁸ Dxel rēb Felip:

—Dad, banee mod majsi yaguaazan bēn naj xDadil.

⁹ Badxi'man laan rēbaman:

—Felip, ma gojc xchej za'nē'n lējt. ¿Nid wayünbeel naj ya? Din bēn ruguiaa naj, da Dadanan ruguiaaman. ¿Chexc zeel nal gunen mod guguiaal da Dadan? ¹⁰ ¿Nid rliladxil ya, naj za'nē' da Dadan, guiáad laaman za'nē naj? Ni rnin lojdi, ad rbēguictanan. Da Dadan, bēn nabannē'n, laaman rüjn dxiin guin. ¹¹ Gol bililadx naj za'nē' da Dadan, guiáad laaman za'nē naj. Balgui majsi ni rünzan gol bililadx. ¹² Diidxliczi ganin: Bēn rliladx naj, nēgajcaman güün ni rünan, güünman ni mazri narooob, din naj yaya' lod za' da Dadan. ¹³ Graczi ni guiniabidi lojman por naj, günanan din gulün xguialrniabeeman. ¹⁴ Günan xhietēez ni guiniabidi.

Guixhiaal Jesús xSprijtaman

¹⁵ Bal rēndi naj, gucaagdiajguidi ni balün. ¹⁶ Din guiē loj da Dadan guixhiaalaman Sprijt sunē lējt, ¹⁷ Sprijt gulüü diidxli, din zianczi sunēman lējt. Bēn ad rliladxt ree Dios ad zajct tia' reeman Sprijt guin, din ad ruguiaat reeman ad nünbee tēēt reeman laaman. Per lējt nünbee laaman, din sunēman lējt yaya'n tēēman luxdoodi tiblyaaa. ¹⁸ Ad zusa'ntan xtijbidi, yaguaalan stijb guidganan lējt. ¹⁹ Sta'nz

riaadx ad zuguaatri ree bénguidxliuj naj, per lëjt guguaadi naj, guibandi din nabanen. ²⁰ Dxej zii ree, gagbeedi za'në' da Dadan, lëjt za'në naj, guiáad naj za'në'n lëjt zianczi. ²¹ Bén rucaagdiajg ni rniabeen rüjn tēēman laan, walicaman rēnman naj. Guiēn da Dadan bén rēn naj, nē naj guiēn laaman din güünbeeman naj.

²² Gunabdiidx Judas (ad bén bayüt Jesús) rēbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

²³ Badxi' Jesúsán rēbaman:

—Bén guiēn naj guzoobaman da diidxan, guiēn da Dadan laaman, guiáad naj guidnë' da Dadan din yabajnnë'n laaman. ²⁴ Bén ad zēnt naj ad zuzoobtaman da diidxan, din diidx cucaagdiajguidi yan ad da diidxtanen, xtiidx da Dadanen bén guxhaal naj.

²⁵ 'Canin lojdi gra nine, la'tgaj za'në'n lëjt. ²⁶ Per xSprijt Dios, bén sunë lëjt zianczi, bén guixhiaal da Dadan por naj, graczi gulüüman lëjt din gusaaladxiidi ni canin.

²⁷ 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliujn, ad bal ru nayadi ad rdxeb tēēdi. ²⁸ Ma rnin lojdi, yaya'n, dxel yaguialan zatijb. Bal walidi rēndi naj, chu' luxdoodi zagdxe, guial gagbeedi yaya' loj da Dadan, din mazri zobjlojman guial lon. ²⁹ Ma rugojnan lëjt, din chi gac zian, chililadxiidi.

³⁰ 'Ad zro'tri ganenë'n lëjt, din ma zēēd xin rniabee guidxliuj, majsi ad nēt naj rniabeex. ³¹ Per zian gac din gagbee ree bénguidxliuj, rēnan da

Dadan, zeel rünan ni rniabeeman. Gol bisu, yo' ree yan.

15

Rën Jesús yadxu'në' reeman zianczi

¹ Basnuu rëb Jesús:

—Naj naj zi'c yag rtia ni nejxh zagdxe, guiáad da Dadan naj zi'c bën rxübin laan. ² Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. ³ Lëjt ma nayadi, guial basia diidx rnin lëjt. ⁴ Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güündi ni rën Dios bal id za'nëdi naj.

⁵ Naj naj zi'c yag rtia ni nejxh, guiáad lëjt naj zi'c xidxan. Bën sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güündi. ⁶ Bën ad zazujnët naj guizëëbaman zi'c yagbidx ruto'p reeman, din che'can.

Rëb tëë Jesús:

⁷ —Bal za'nëdi naj tijbzi ruzoob tëëdi da diidxan, gol gunab ni rëntzidi, din tia'dan. ⁸ Bal güündi ni rën da Dadan, gaquidi quijb da bejnan, din guza't ree bejn laaman zagdxe. ⁹ Rënan lëjt zi'c rën da Dadan naj, gol basaaladx rënan lëjt. ¹⁰ Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeen rënman naj.

¹¹ 'Rnin lojdi zian din chu' luxdoodi zagdxe zi'c yu' luxdon zagdxe, zagdxe da't chu' luxdoodi.

¹² Gol guyën lasa'di zi'c rënan lëjt, laan rniabeen güüнди. ¹³ Achut rën xmiw mazri guial loj bën rëjt por laa reeman. ¹⁴ Lëjt naj da miwan bal güüнди ni rënan. ¹⁵ Ad zanetran lëjt mojs, din mojs ad ragbeetaman xhie rüjn bën rniabee laaman. Ganen lëjt miw, din balün lëjt graczi ni na da Dadan lon. ¹⁶ Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj. ¹⁷ Rniabeen: Guiën lasa'di.

Ralen ree bejn Jesús con ree xbejnman

¹⁸ Rëb tëë Jesús:

—Bal ralen ree bénguidxliuj lëjt, gol basaaladx, yaloj naj balen reeman. ¹⁹ Bal niajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. ²⁰ Gol basaaladx ni rnin: “Achut mojs naj mazri guial loj bën rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da didixan, ziangajc guzoob reeman xtiidxidi. ²¹ Graczi nine güünnë reeman lëjt por naj, din ad nünbeet reeman bën guxhaal naj.

²² Achet xtol reeman niu, bal idan nial ninienë'n laa reeman, per yan yu' xtol reeman. ²³ Bén ralen naj, nëgajc da Dadan ralenman. ²⁴ Achet xtol reeman niu, bal idan nün ree ni benan loj reeman ni achutczi wayüjn, per ma baguiaa reeman laa reen, majsi zian ralen gajc reeman naj në da Dadan. ²⁵ Per rajc zian din gac cumplid ni ca loj xley reeman, rëban: “Achet rünan ralen reeman naj.”

²⁶ 'Per chi gui't Sprijt gaxhalan din sunëman lëjt gulüü tēëman diidxli, Sprijt zëed loj da Dadan, laaman gü da diidxan. ²⁷ Nëgajc lëjt gü laan, din diizd yaloj za'nëdi naj.

16

¹ 'Rnin zian, din ad zabëjzt chililadxidi naj. ² Yabëë reeman lëjt lod ricaagdiajg reeman xtiidx Dios, zadxin dxej, chutëëz bën gugüjt lëjt naladx reeman Dios cayüjn reeman wen. ³ Güün reeman zian din ad nünbeet reeman naj ni'qui da Dadan. ⁴ Per ma rnin lëjt, din chi guidxin dxej guin gusaal-
adxidi guial ma bagojnan lëjt.

Ni rüjn xSprijt Dios

'Ad rnitan lojdi zian diizd yaloj, din naj guzunë lëjt. ⁵ Per yan yaya'n loj bën guxhaal naj. Achutczidi rniabdiidx ban gan, ⁶ aal yu'nayadi guial canin zian. ⁷ Per diidxliczi rnin: zagdxe najn yaya'n. Din bal idan yaya', ad zi'tt xSprijt Dios sunë lëjt, per bal yaya'n, naj gaxhal laaman. ⁸ Chi gui'taman, laaman gulüü ree bénguidxliuj ni naj dol, ni naj ni zagdxe, në xguialguxtis Dios. ⁹ Gagbee reeman yu' xtol reeman, guial ad rliladxt reeman naj. ¹⁰ Ni zagdxe guin naj guial yaya' loj da Dadan din ad zuguaatrídi naj. ¹¹ Guiáad Dios ma been xguialguxtisaman con xindxab rniabee guidxliuj.

¹² 'Yu'ri ni rënan ganin, per dád zien gacan par lëjt. ¹³ Chi gui't Sprijt gulüü lëjt diidxli, din ad züt xtiidx gajcaman, guinieeman graczi ni guienman, laaman gulüü lëjt ni gac. ¹⁴ Guza'taman naj zagdxe, din naj gudëd ni gulüüman lëjt. ¹⁵ Graczi ni

rajp da Dadan naj par naj, zeel rnin, Sprijt guin tia' ni gudëdan din gulüüman laan lëjt.

Guguaa ree xbejn Jesús laaman zatijb

¹⁶ 'Ma guidxin dxej ad zuguaatrìdi naj, per ad zajct xchej, guguaadi naj stijb.

¹⁷ Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zuguaatri reeman, per ad zajct xchej, yaguaa reeman stijb, din yaguaaj loj xDadaman? ¹⁸ ¿Chexc zeel naman: “Ad zajct xchej”? Ad rayignia't ree ni caneeman.

¹⁹ Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatrìdi naj, per ad zajct xchej, guguaadi naj stijb. ¿Ni nen canabdiidxidi ya? ²⁰ Diidxli ganin, goondi chu' tëë luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. ²¹ Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdooan zagdxë, guial ma gojl xi'nman. ²² Ziangajc lëjt cadëdidi tarbajw yan, per chi guguan lëjt zatijb, chu' luxdoodi zagdxë, achutczi zajc yabëë laan luxdoodi.

²³ 'Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman. ²⁴ Guiáad yan achet wanabidi por naj, gol gunaban din tia'dan, din chu' luxdoodi zagdxë tiblayaa.

Yaguaaj Jesús lod guzaman

25 Rëb tëë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdxe xcwent da Dadan. 26 Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman, 27 din rënman lëjt, rënman lëjt guial rëndi naj rliladx tëëdi guial laaman guxhaal naj. 28 Briin lod za' da Dadan persi bialan loj guidxliuj guie, yan gusa'n nan laan din yaya'n lojman.

29 Dxel rëb ree xbejnman:

—Yanri ma cusignia'l zagdxe. 30 Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

31 Badxi' Jesús laan rëbaman:

—¿Ma rliladxidi yan ya? 32 Gol gogbee, ma bidxin hor yare'chidi, tijb gajdi yaguiaj lidx, gusa'ndi da xtijban. Per ad za't da xtijban, da Dadan za'në naj. 33 Rnin gra nine din cwedi zagdxe guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

17

Gurejdx gunab Jesús xDadaman por ree xbejnman

1 Chi gulox rëb Jesús zian loj ree xbejnman, dxel baguiaaman xanyabaa rëbaman:

—Dad, ma bidxin hor, balüü da guialrniabeen din gulün xguialrniabeel. 2 Baneel guialrniabee lon din ganabeen gra bejn gudëd tëën guialnaban tiblayaa loj gra bën baneel. 3 Guiban reeman tiblayaa bal güünbee reeman lüj, tijbzi lüj naj quijb Dios, güünbee tëë reeman najn guxhaalil.

⁴ 'Naj bazat lüj zagdxe loj guidxliuj; yan ma gulox benan ni nal. ⁵ Yan, Dad, yaguialan lojl, din yaneel guialrniabee ca'n gocli, diizd chi gad guidxliuj gacchaaw.

⁶ Rëb tëë Jesús:

—Bén gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. ⁷ Yan ma gogbee reeman guial gra ni benan gra tëë ni balün naj xieenl. ⁸ Gunen xtiidxil ni baneel, zeel bacaagdiajg reeman laan, gogbee reeman, wali-can lojl guzaan, bililadx tëë reeman lüj guxhaal naj.

⁹ 'Rbedx rniaaban lüj por laa reeman, guial naj reeman xbejnl baneë tëël laa reeman lon, ad rbedx rniaabtan por ree bénguidxliuj. ¹⁰ Gra ni ca'n naj xieenl, guiáad gra ni ca'l naj da xieenan, ma rguien da guialrniabeen por ree bén baneel.

¹¹ 'Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bén naya nali, gunaj reeman con gra guialrniabee ca'l ni baneë tëël lon, din gac reeman tijbzi zi'c nayajc. ¹² Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëëb, tijbzi xin ma naj diidx bizëëb, din gac cumplid ni ca loj xtiidxil.

¹³ 'Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon zagdxe. ¹⁴ Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc

ad najtan bénguidxliuj. ¹⁵ Ad rniaabtan yabëel laa reeman loj guidxliuj, rënan guinial laa reeman, chitëë güün reeman ni mal. ¹⁶ Ad najt reeman bénguidxliuj, zi'cgajc naj. ¹⁷ Basia reeman con xti-idxil, din laan naj ni diidxli. ¹⁸ Zi'c guxhaalil naj loj ree bénguidxliuj, ziangajc rixhial ree da bejnan loj reeman. ¹⁹ Por laa reeman rudëd da guialnabanan din gac reeman xbejn diidxliczi.

²⁰ Basnuu Jesús, rëbaman:

—Ad por laatzi reeman rbedx rniaaban lüj, në por ree bén chililadx chi gucaagdiajg reeman ni guinee reeman. ²¹ Rniaaban lojl din guchajg lasa' reeman din yayajcnë' reeman tijbzi, Dad, zi'c za'nël naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj. ²² Badëdan guialrniabee baneel loj reeman, din gac reeman tijbzi zi'c nayajc, ²³ naj za'në' laa reeman, guiáad lüj za'nël naj. Zeel gac reeman tijbzi din gagbee ree bejn, lüj guxhaal naj rën tëël laa reeman zi'c rënl naj.

²⁴ 'Dad, lüj baneel laa reeman lon, zeel rënan su reeman lod gazun din guguaa reeman biani baneel lon, din guyënl naj diizd chi gad guidxliuj gacchaaw. ²⁵ Dad, lüj rüjn guialguxtis zagdxe. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. ²⁶ Balün laa reeman chu najl, gulüran laa reeman mazri, din gagbee reeman rënl laa reeman zi'c rënl naj, gazunë' tëën laa reeman.

*Bayü Judas Jesús**(Mt. 26:47-56; Mr. 14:43-50; Lc. 22:47-53)*

¹ Chi gulox gunee Jesús zian, dxel briinë ree xbejnman, zë reeman stiblad ro' guiiw la Cedrón, bidxin reeman lod yu' ree yag. ²Në Judas, xin yayü laaman, nünbee yagaj, guial zien volt binëman laa reeman ni. ³Zeel bidxinnëx tibcwaa ree suldad në ree bën rajp ro' yadoo, guxhaal quijb ree bixhioz laa reeman në ree bënfarisew, ca' reeman bajl rusni ree, në ree espad con ree lans. ⁴Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguuilidi?

⁵Badxi' reeman laan rëb reeman:

—Jesús bën Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman.

⁶Chi rëbaman loj reeman: “Najn”, dxel baguiadruxan reeman biajb reeman luyuj.

⁷Gunabdiidxaman zatijb rëbaman:

—¿Chu raguuilidi?

Rëb reeman:

—Jesús bën Nazaret.

⁸Zeel rëbaman:

—Ma rnin, najn. Bal naj raguuilidi, gol baslaa ree bën guie yaguiaj reeman.

⁹Zian gojc cumplid ni rëb loj xDadaman: “Achut ree bën baneel lon bizëëb.” ¹⁰Dxel gulëë Bëd espad, gutü'man guidiajg ladbee xin la Malco, najx xmojs quijb bixhioz zojbloj. ¹¹Dxel rëb Jesús loj Bëd:

—Bagu'chaaw espad zii. Bal rën da Dadan gaza-agdiajn zian, gaza'canan.

Biniaaz Jesús

(Mt. 26:57-58; Mr. 14:53-54; Lc. 22:54)

¹² Suldad guin ree con xin rniabee laa reex con ree bén rajp ro' yadoo gunaaz reeman Jesús, guxhii reeman laaman. ¹³ Dxel binë reeman laaman yaloj lidx bén la Anás, din laaman naj xdadsuegr Caifás quijb bixhioz zojbloj loj ijz zii. ¹⁴ Laagajcaman rëb loj gabilt, mazri zagdxe guiët tijbzi bejn por gra ree bén Israel.

Rëb Bëd ad najtaman xbejn Jesús

(Mt. 26:69-70; Mr. 14:66-68; Lc. 22:55-57)

¹⁵ Tio'p ree xbejn Jesús binal laaman. Tijbaman la Simón, bén rniee reeman Bëd, stijbaman naj bén nünbee quijb bixhioz zojbloj, zeel guyunëman Jesús lënü guin, ¹⁶ guiáad Bëd baya'nman lule'. Zeel barii bén nünbee bén rniabee ree bixhioz, guneenëman biin rajp ro' port guin, persi guyu Bëd lënü. ¹⁷ Gunabdiidxim lojman rëbim:

—¿Nid lüjn naj tijb xbejn bén guin ya?

Badxi'man laan rëbaman:

—Ad najtan.

¹⁸ Per guial dád nayaag, zeel bén naj ree mojs con ree bén rajp ro' yadoo nabe'c reeman guij rucha'reeman. Nëgajc Bëd cucha'në reeman rudëj guin.

Gunabdiidx Anás loj Jesús

(Mt. 26:59-66; Mr. 14:55-64; Lc. 22:66-71)

¹⁹ Guzuloj bén la Anás canabdiidxaman loj Jesús xcwent ree xbejnman në xcwent ni rulüüman.

²⁰ Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lèn dux yadooro' ree, lod rado'p dugra ree. Achet ni gunen ralan. ²¹ ¿Chexc zeel rniabdiidxil lon? Gunabdiidx loj ree bèn bacaagdiajg ni rën, laa reeman na xhie gunen, laa reeman ragbee.

²² Chi rëbaman zian, tijb bèn rajp ro' yadoo guin wëez ro'man, rëbaman:

—¿Zian yadxi'l xtiidx bèn rniabee guin ya?

²³ Badxi' Jesús laan rëbaman:

—Bal xhie ni mal rën, guna xhienin. Per bal gunen zagdex, ¿chexc zeel rguinl naj?

²⁴ Dxel guidib naxiiman guxhaal Anás laaman loj Caifás, bèn naj quijb bixhioz zojbloj.

Rëb Bëd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

²⁵ Per Bëd sta za'man cucha'man rudëj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn bèn guin ya?

Badxi' Bëd laan rëbaman:

—A'n, ad xbejntaman naj.

²⁶ Dxel tijb xmojs bixhioz zojbloj guin, bèn naj lasa' bèn gutü' Bëd guidiajg, rëbaman loj Bëd:

—¿Nid lüjn baguian ya za'nël laaman guia' ree yag olivos?

²⁷ Rëb Bëd stijb guial ad nünbeetaman Jesús, loj hor zii gajc guridxa' tijb guid.

Binë reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Chi bani luyuj, bazanë reeman Jesús lidx Caifás, zinë reeman laaman lèn xpalas gobernador Pilato. Per ree bèn Israel guin ad guyut

reeman lèn palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche gualraw ni raw reeman pascw. ²⁹ Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

³⁰ Badxi' reeman laan rëb reeman:

—Bal najman benza'c, ad ziant nudnë'n laaman lojl.

³¹ Dxel rëb Pilato:

—Gol bignëx, gol been gualguxtis zi'c naj xleydi.

Abi' rëb reeman:

—Per ad naca'tan gualrniabee yanabeen guiët bejn.

³² Zian gojc cumplid xtiidx Jesús chi bagojnman xhienaag guiëtaman. ³³ Bayu Pilato lèn palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree bën Israel ya?

³⁴ Badxi' Jesúsán rëbaman:

—¿Lüjczi rniabdiidx lon ya o yu' ree ben ren na lojl zian?

³⁵ Badxi' Pilato laan, rëbaman:

—¿Wen bën Israel naj ya? Bën ladx gajc reel con ree bixhioz rniabee bidnë lüj lon. ¿Xhie beenl?

³⁶ Badxi' Jesúsán rëbaman:

—Gualrniabee ni ra'pan ad lojt guidxliuj zan, din bal loj guidxliuj zan, nia'pan bën nidijl ree chitëë niniaaz ree ben Israel naj. Per yan ad lojt guidxliuj guie za da gualrniabeen.

³⁷ Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bën zinal ni diidxli rucaagdiajg reeman ni rnien.

³⁸ Dxel rëb Pilato:

—¿Xhiezanan naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bën Israel ree stijb, rëbaman:

—Achet xguialquia xin guin radxejlan. ³⁹ Per lëjt, xcostumbridi naj guial loj lanij pascw laa tijb bën yu' ladxguiib. Yan, ¿rëndi ya guslaan xreydi?

⁴⁰ Dxel gurixdiaj ree bën Israel guin, rëb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin béngubaanan.

19

¹ Dxel gunabee Pilato gudijn ree suldad Jesús.

² Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. ³ Dxel gubig reeman lojman, rëbgaj reeman:

—¡Guibanri xrey ree bën Israel!

Dxel rëëzgaj reeman lojman.

⁴ Brii Pilato stijb, abi' rëbaman loj ree bën Israel guin:

—Gol baguiaa, gabën laax din gagbeedi, achet xguialquiax radxejlan.

⁵ Dxel brii Jesús, yu' coron guiějch guin guijca-man, najcw tēēman lajd xnia guin. Abi' rēb Pilato:
—Laax guie.

⁶ Dxel bixhioz rniabee ree nē ree bēn rajp ro' yadooro' Jerusalén, chi baguiaa reeman laaman, guzuloj rbixdiaj reeman, rēb reeman:

—¡Bacaax loj crūjz! ¡Bacaax loj crūjz!

Rēb Pilato loj reeman:

—Gol chinēx, lējt gol bacaax loj crūjz, achet xtolix radxejlan.

⁷ Badxi' reeman laan rēb reeman:

—Laa tijb dux leyan yu', rēb lojn rayal guiētix, guial nax najx Xi'n Dios.

⁸ Chi biguienman ni rēb reeman, mazri bidxebaman. ⁹ Bayuman lēn palas guin zatijb, gunab-diidxaman loj Jesús rēbaman:

—¿Ban xin lūj?

Per ad badxi't Jesús laan. ¹⁰ Zeel rēb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lūj loj crūjz o guslaan lūj ya?

¹¹ Dxel rēb Jesús:

—Achetczi guialrniabee nitia'l bal id Dios nuneē laan. Zianan zeel mazri zien xtol bēn bidnē naj guie yu' guial lojl.

¹² Diizd hor zii gajc raguiil Pilato mod, xhienaag guslaaman Jesús, per rbidxa' ree bēn riga' yagaj, rēb reeman:

—¡Bal guslaal laax, ad najtil xmiw bēn naj César! ¡Din chutēēz bēn rajc rey rzuj contr César!

¹³ Chi biguien Pilato rēb reeman zian, gunabee-man babēē reeman Jesús, dxel gurej lod rniabee-man, lod la Gabata con diidx hebreo, rēn guiēban

Lod yu' ree guiaj. ¹⁴ Chi guixiez gal lanij pascw, cost garol dxej rëb Pilato loj ree bën Israel:

—¡Laa xreydi guie!

¹⁵ Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶ Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷ Briinë reex Jesús, nüüman crüjz, binë reex laaman lod la Calaver, diidx hebreo lan Gólgota.

¹⁸ Ni bacaa reex laaman loj crüjz con zatio'p ree bejn, tijb gaj reeman ca cwë'man. ¹⁹ Gunabee Pilato cwa lejtr guiyc crüjz guin, rëban: “Jesús bën Nazaret, xrey ree bën Israel.” ²⁰ Dád zien ree bën Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. ²¹ Rëb ree bixhioz rniabee ree bixhioz loj Pilato:

—Ad rucaal: “Xrey ree bën Israel”, bacaa: “Bën rëb naj xrey ree bën Israel.”

²² Badxi' Pilato laan rëbaman:

—Ni ma bacan yaya'n nan zian.

²³ Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadiibtan, najcchaaw diizd yëjnan xt guia'n, najn tijbzi lajd. ²⁴ Zeel rëb loj lasa' reex:

—Ad zaroost reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëë reeman suert guijcan.” Zeel been ree xinsuldad guin zian.

²⁵ Gajxh cwë' crüjz ca Jesús za' xniaaman con xbël xniaaman con Li xbéngunaa Cleofas con Li bën gunee reeman Magdalena. ²⁶ Chi baguiaa Jesús xniaaman, za' tijb ree xbejnman cwë'man, bën rën da'taman, rëb loj xniaaman:

—Na, laa xi'n'l yagaj.

²⁷ Dxel rëb loj xbejnman:

—Laa xniaal yagaj.

Diizd dxej zii bignëman xniaa Jesús lidxaman.

Güjt Jesús

(Mt. 27:45-56; Mr. 15:33-41; Lc. 23:44-49)

²⁸ Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

²⁹ Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. ³⁰ Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

Guliiz tijb suldad guiib cwë'lën Jesús

³¹ Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüjz dxej raziiladx reeman, din dád rajp reeman dxej guin respekt. Zeel biguiedx reeman loj Pilato din nabeeman qui'ch ree suldad

guin xdxijt ree b n ca loj cr jz din gui t reeman yalet t e reex laa reeman. ³² Zeel wej reex. Yaloj gudi'ch reex xdxijt b n ca cw ' Jes s, dxel gudi'ch reex xdxijt b n ca stiblad cw 'man. ³³ Chi gubig reex lod ca Jes s, baguiaa reex ma g jtaman, zeel ad gudi'cht reex xdxijtaman.

³⁴ Per tijb suldad guin guxhal ladaman con guiib ca'x, dxel briin rejn con nijs. ³⁵ B n r  diidx guie baguiaaman, zeel ragbeeman najn diidxli, r man laan din n  l jt chililadx. ³⁶ Gra nine gojc din gac cumplid ni ca loj xtiidx Dios, r ban: “Ad rayalt gach xdxijt xiildoo.” ³⁷ Stibljat r b: “Guguaiaa reeman b n guxhaln  reeman guiib lad.”

Biguie'ch Jes s

(Mt. 27:57-61; Mr. 15:42-47; Lc. 23:50-56)

³⁸ Chi gulox gojc zian, wej Xi b, b n z ed guiedx la Arimatea, bignabaman diidxbee loj Pilato din yaletaman xcuerp Jes s din chiquie'chaman laaman. N  b n la Xi b bililadx Jes s, per ralanzi, guial bidxebaman bejn ree. Bad ed Pilato diidxbee, zeel wej Xi b bigxiiman xcuerp Jes s. ³⁹ N  Nicodemo wej, b n bigneen  Jes s tijb guxhin, bidxinn man cost gajlbichii quil ni la mirra, no'chan aloe, rureen nejxh. ⁴⁰ Bagajdxn  reeman laan lajd bat ub reeman laaman, zi'c r jn ree b n Israel chi ruquie'ch reeman beng t. ⁴¹ Lod cwa Jes s loj cr jz naga' tijb guidxliuj lod yu' ree yag. Yagaj naj tijb baa c b lod achutczi waguie'ch. ⁴² Yagaj gudixh reeman xcuerpaman, guial najn gajxh, guial ma suloj t e dxej raziiladx reeman.

20

Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

¹ Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. ² Dxel ruxüünman wejman lod za' Simón Béd con zatijb xbejn Jesús, bén rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

³ Abi' brie Béd con bén guin, zë reeman ro' baa guin. ⁴ Grop reeman ruxüün zë reeman. Per bén guin mazri ruxüünman guial loj Béd, abi' yaloj laaman bidxin ro' baa guin. ⁵ Dxel gudixlojman baguiaaman vend bidüüb Jesús, per ad guyutaman. ⁶ Dxelri bidxin Simón Béd, abi' guyuman lën baa guin. Nëgajcaman baguiaa vend guin ⁷ Baguiaa tëëman lajd bidüüb guijc Jesús, nadüüban naga'n lood ren, ad naga'tan tijbzi con vend guin. ⁸ Dxel guyu bén bidxin ro' baa guin yaloj, baguiaaman ni goc, zianz bililadxaman, ⁹ guial gocli ad bignia't reeman ni ca loj xtiidx Dios guial yaban Jesús loj ree bengüt. ¹⁰ Dxel zia ree xbejn Jesús lidx reeman.

Baliüloj Jesús loj María Magdalena

(Mr. 16:9-11)

¹¹ Per Li baya'nman ro' baa guin cayoonman. La'tgaj cayoonman gudixlojman lën baa guin, ¹² abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman, zatijbaman lod go't

guia'man. ¹³ Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴ Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. ¹⁵ Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguuilil?

Gunaladx Li, bën rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'nl laaman din chigxin laaman.

¹⁶ Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

¹⁷ Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguedx loj ree da bejnan guial yaya' loj da Dadan bën naj gajc xDadidi, loj da Diosan bën naj gajc xDiosidi.

¹⁸ Dxel wej María Magdalena bicojnman xbejn ree Dad Jesús guial baguiaaman laaman, bagojn tëëman laa reeman gra ni rëbaman lojman.

Balüüloj Jesús loj ree xbejnman

(Mt. 28:16-20; Mr. 16:14-18; Lc. 24:36-49)

¹⁹ Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁰ Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús. ²¹ Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

²² Dxel balüjbaman guijs reeman, rëbaman:

—Gol gubajnnë xSprijt Dios. ²³ Bén güüнди perdon xtol, chiquied xtol reeman, guiáad bén ad züjntidi perdon xtol, yaya'nnë xtol reeman.

Baguiaa Tumajs Jesús

²⁴ Tumajs, bén rniee reeman Cwajch, achut laaman za' chi balüüloj Jesús loj ree xbejnman. ²⁵ Chi rëb reeman loj Tumajs:

—Ma baguiaan Dad Jesús.

Dxel rëbaman:

—Bal id zuguiian yaaman lod wëéz clav, abi' bal id zagu' da bacwënan lod wëéz clav guin, bal id zagu' tëë yan cwë'lënman lod bidxeelguijdx, ad zaliladxtan.

²⁶ Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁷ Dxel rëbaman loj Tumajs:

—Badxe' xbacwënl guie, baguiaa ree yan, banee yaal guie badxe'n cwë' lënan. Ad runawëëgril, bililadx.

²⁸ Dxel rëb Tumajs lojman:

—¡Da Dadan, da Diosan!

²⁹ Abi' rëb Jesús lojman:

—Rliladxil guial ma baguiaal naj. Xiquilbaa ree b́en rliladx, majs ad waguiaat reeman naj.

Chexc zeel cwa gui'ch guie

³⁰ Zienri ree milagr been Jesús loj ree xbejnman, ni ad cwat ree loj gui'ch guie. ³¹ Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

21

Balüüloj Jesús loj ree xbejnman ro' nijs

¹ Chi gudéd gojc zian, balüüloj Jesús loj ree xbejnman zatijb, ro' nijs naj gajxh guiedx Tiberias. Ze balüülojman: ² Chi nadxag lasa' ree Simón Béd con Tumajs b́en rniee reeman Cwajch, nē Natanael b́en za Caná guiedx riga' niz Galilea, con ree xi'n Zebedeo, nētēē zatio'p xbejn Jesús, ³ dxel rēb Béd loj reeman:

—Gan chignaazan bëjl.

Badxi' reeman laan rēb reeman:

—Nē dunujn yadxoo.

Abi' wē'p reeman loj barcw zē reeman, per guxhin zii achutczi bëjl gunaaz reeman. ⁴ Chi ma cayreguiaal, bidxin Jesús ro' nijs guin, per ad bayünbeet reeman laaman. ⁵ Dxel gunabdiidxaman loj reeman rēbaman:

—Xi'n, ¿nid chu bëjl wanaazidi ya?

Badxi' reeman laan rēb reeman:

—Achutczi.

⁶ Abi' rēb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. ⁷ Dxel xbejn Jesús, bën rën da'taman, rëbaman loj Bëd:

—¡Dad Jesúsán!

Bigueijnzi Simón Bëd zian, laa got gajc xabaman ni gulëëman, abi' gutiajsaman lojnijs guin. ⁸ Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. ⁹ Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj. ¹⁰ Dxel rëb Jesús loj reeman:

—Gol tanë tio'p choon bëjl gunaaz nejzidi.

¹¹ Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan. ¹² Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdi-idx chu bënan, guial ragbee reeman Dad Jesúsán. ¹³ Dxel gubigaman cwa'man guiadxtil badëëman loj reeman, ziangajc beenman con bëjl guin. ¹⁴ Ni ne bayon volt balüüloj Jesús loj ree xbejnman chi babanman loj ree bengüt.

Guneenë Jesús Bëd

¹⁵ Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rën! naj mazri guial loj ree bën guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiildoon.

¹⁶ Abi' rëb Jesús zatijb:

—Simón, xi'n Waj, ¿walil ya rënl naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

¹⁷ Bayon volt gunabdiidx Jesús rëbaman:

—Simón, xi'n Waj, ¿rënl naj ya?

Dád guyunaya Bëd, guial ma gojc choon volt gunabdiidx Jesús bal rënman laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. ¹⁸ Diidxliczi ganin, chi goquil xinguiag, rajcw xabil persi rejł lod rënl. Per chi ma najł bengol, gusli xu'quil din guscajcw ben ren xabil din chinë reeman lüj lod ad rëntil chel.

¹⁹ Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

Ni ne bacaa xbejn Jesús bën guyën da'taman

²⁰ Chi badxi' loj Bëd, baguiaaman laa bën rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tēëman loj Jesús rëbaman: “Dad, ¿chu yayü lüj?” ²¹ Chi baguiaa Bëd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

²² Badxi' Jesúsán rëbaman:

—Bal rēnan guibanx xt yaguialan, ¿xhie güünl?
Lüj tanal naj.

²³ Zianan zeel bire'ch diidx loj ree xbejnman guial ad zējtt bēn guin. Per ad ziantan rēb Jesús, rēbaman: “Bal rēnan guibanx xt yaguialan, ¿xhie güünl?”

²⁴ Bēn guin gajcan rü diidx xcwent ree nine, laa tēēman bacaa laan, rayagbee tēē ree rüman diidxli.

²⁵ Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni niajc.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fb4ebcb8-e1f4-5bfc-b08c-f590e137d86d